

Crisis den Medio Oriente ta sacudi mercado di energia cu posible efecto pa Aruba



Pagina 4

- **CAft: Aruba a cera 2025 cu surplus fuerte, pero inversionnan di gobierno ta keda atras**

Pagina 3

- **PM Hulandes no ta cla pa corta impuesto riba combustibel**

Pagina 9

- **Gobierno di Guatemala ta fortalece medidanan pa mehora su calificacion di credito**

Pagina 10

Fraccion MEP considerando opcion di “Encuesta Parlamentario” den caso di minister Gerlien Croes




Pagina 2

Francia y su aliadonan preparando pa habri Estrecho di Hormuz “gradualmente”



Pagina 22

Putin a felicita yiu di Khamenei pa hereda puesto di lider supremo di Iran



Pagina 23

Fraccion MEP considerando opcion di “Encuesta Parlamentario” den caso di minister Gerlien Croes

Ayera mediante un comunicado di prensa, e fraccion grandi di oposicion den Parlamento, MEP a anuncia cu nan ta considerando di haci uso di e instrumento di control mas fuerte segun ley pa haya sa e berdad tocante e caso di vuelo priva di minister di Educacion, Deporte, Hubentud, Innovacion y Relacionnan di Reino, Gerlien Croes (Futuro).

“Den e cuadro di integridad y bon gobernacion, e fraccion awor ta considerando e instrumento di control mas fuerte cu ley ta brinda: un Encuesta Parlamentario pa yega na e berdad den e caso di Minister Gerlien Croes,” MEP a bisa den e comunicado.

E comunicado ta agrega cu diaranson ultimo, Parlamento a trata un ley di iniciativa di e parlamentarionan Edgar Vrolijk y Rocco Tjon. Cu esaki, Vrolijk ta marca su di 9 ley di iniciativa y Tjon su di 5. E cifranan aki ta papia pa nan mes: MEP ta tuma su responsabilidad cu e comunidad hopi serio, dunando contenido real na e derecho di iniciativa (initiatiefrecht).

“Pa e Fraccion di MEP, integridad no ta un concepto bashi, sino e fundeshi di confianza entre un gobernante y su pueblo. Ora ta cuestiona un minister riba su actonan, manera e biahe den un jet priva, e unico contesta aceptabel ta e berdad absoluto y transparente.”

Lider di Fraccion, Evelyn Wever-Croes, a splica cu MEP ta cla pa e siguiente paso den nomber di e bienestar di Aruba. “Nos ta considerando seriamente pa inicia un Encuesta Parlamentario. Esaki ta un instrumento fuerte di control pasobra pueblo tin e derecho sagrado di sa kico ta e berdad. Te awe, Minister Gerlien Croes no a duna un contesta cla ni transparente. Ora un Minister faya den su deber di duna cuenta, Parlamento mester actua pa restaura e respet pa nos institucionnan.”

Encuesta Parlamentario

Un Encuesta Parlamentario, na Hulandes un Parlementaire Enquête, ta e mecanismo mas fuerte di investigacion

cu Parlamento tin. Na Aruba, e ta regula den e Landsverordening parlementaire enquête, cu ta bisa cu Parlamento por, riba propuesta di un of mas miembro, dicidi pa tene un encuesta parlamentario. Un Comité di Staten ta keda encarga di esaki.

E decision pa tene un Encuesta Parlamentario mester inclui un descripcion di e tema di e investigacion. Staten por cambia e descripcion cu of sin propuesta di e comite di investigacion. Ademas, e comite por ehersce su podernan for di e dia despues di e Landscourante den cual e decision pa tene e Encuesta keda publica, y por continua te dia cu Staten finalisa e investigacion. E poder y actividadnan di e comite no ta termina na momento cu un mandato parlamentario caba, of cu disolucion di parlamento. Finalmente, e comite ta presenta su hallazgonan den un rapport publico, cu ta presenta na Staten.

“Nos lo usa tur medio legal na nos alcanse pa haya e berdad. Pueblo di Aruba ta merece gobernantenan cu ta actua cu honestidad y cu no ta sconde tras di tecnicismo. Transparencia no ta un opcion, e ta nos deber principal pa cu e pueblo cu nos ta sirbi,” Evelyn Wever-Croes a finalisa bisando.

Transparencia y legalidad

Ya durante weekend, partido MEP a duna indicacion cu tabata preparando pa continua escalando e bataya politico contra minister Gerlien Croes. Den un video publica riba rednan social, parlamentario Rocco Tjon a trece dilanti asuntonan di integridad y transparencia. “Ultimamente tin hopi discusion rond di e biahe den ‘private jet’ di un mandatario,” Tjon ta bisa den e video. “Mi kier ta hopi cla den esaki: E no ta un atake personal, y esaki no tin di haber cu e persona.”

Tjon a continua splica cu e asunto realmente “ta trata integridad y transparencia den nos gobernacion.”

E parlamentario a menciona cu Parlamento tin deber di controla, y den e caso di e biahe den jet priva di e minister en cuestion, su frac-

cion “a sigui tur e pasonan cu ley ta prescribi.” Esakinan ta inclui manda pregunta por escrito; haci peticion na presidente di parlamento pa yama un reunion publico y un vragenuur pa por debati cu e minister riba e topico; y hasta a haci un LOB-verzoek – un peticion a base di ley di transparencia di gobierno. Sinembargo, Tjon ta lamenta cu “e realidad awe ta cu e preguntanan por escrito no a wordo contesta, e peticion pa un reunion publico y vragenuur no a wordo yama door di presidente di parlamento, y e peticion a base di ley – e asina-yama LOB-verzoek – cu ta obliga e minister pa brinda transparencia, a wordo nenga door di su persona sin ningun tipo di hustificacion.” Por recorda cu inicialmente, minister Gerlien Croes a pidi un extension di tres siman prome cu responde na e LOB-verzoek. Despues di e tres siman, el a contesta e parlamentarionan indicando cu no lo duna e contestanan solicita pasobra no a entrega e LOB-verzoek corectamente – sin indica kico precies den e solicitud tabata incorrecto.

Tjon ta enfatiza cu “ora un minister nenga di duna cuenta na cas di pueblo, e ta debilita nos democracia.”

E parlamentario a continua bisando cu “awo e situacion a bira mas serio”, pasobra e fraccion tin un opinion legal a base di ley di expertonan di aviacion di Merca, specialisa den ley federal di FAA. Den e opinion, e expertonan a splica cu si minister Croes a paga pa e vuelo en cuestion, den e avion cu el a bula sin procedura legal corecto, esaki lo ser considera “unlawful” – contra ley Mericano, segun e leynan aplicable na e avion specifico den e caso. “Esaki no ta ningun opinion politico,” Tjon a continua, “esaki ta un analisis legal di e autoridad y e expertonan den aviacion mas halto na Merca.”

Finalizando, Tjon ta resalta cu “transparencia no ta un favor cu un minister ta haci. E ta mas bien un obligacion.”

Sin contesta

Ya ta varios luna cu parlamentarionan di MEP ta buscando contesta tocante e biahe di minister Gerlien Croes den jet priva, na november di año



pasa. Te awo, e minister no a duna ningun contesta satisfactorio.

Den centro di e polemica tin e asunto si e minister lo por a paga pa e biahe of e tabata un “regalo.”

December ultimo den un transmision live riba rednan social, lider di MEP, Evelyn Wever-Croes a duna splicacion tocante e situacion. Segun Wever-Croes, minister Gerlien Croes tabatin autorisacion formal di Consejo di Minister pa un biahe cu tabata programa pa dia 20 di november. El a informa Parlamento y tabatin su documento regla, siguiendo e procedimiento cu ley ta exige. Pero e controversia a surgi ora cu e mandatario a dicidi sali un dia prome—dia 19 di november—cu a coincide cu e yegada di e seleccion di futbol di Corsou despues di nan clasificacion pa mundial.

Parlamentario Wever-Croes ta afirma cu esaki no tabata cubri pa ningun decision nobo di Consejo di Minister, y cu e forma den cual e vuelo a tuma luga por representa un violacion di codigo di conducta pa minister. E codigo aki ta prohibi ministernan di ricibi regalo di gran valor economico.

Durante su transmision,

Wever-Croes a insisti riba importancia di transparencia. Un minister, el a indica, “no por bula den un jet priva, hay’e di regalo cabey boto pa bay cune, pasobra e ta un regalo di un valor demasiado grandi.”

Segun e parlamentario un biahe den jet priva, cu por trankilamente costa entre cuatro y cinco mil dollar, no por keda sin un splicacion ni sin prueba di pago. Pa e motibo aki e ta insisti cu pueblo mester haya un prueba real cu e minister efectivamente a cubri e gasto cu su propio placa.

Wever-Croes a manda pregunta den Parlamento pa minister Gerlien Croes y prome minister Mike Eman, pero no a ricibi respuesta directo na e preguntanan. Minister Croes a reacciona mandando documento cu el a presenta como prueba na Parlamento, pero segun e lider di fraccion di MEP, niun tabata coresponde cu e vuelo specifico di 19 di november. E minister a entrega algun documento, pero segun oposicion, sin toca e unico documento cu ta importante: un factura y un recibo legitimo di e vuelo den jet priva. “Si bo mes a paga, bo no tin nada di sconde, bo ta publica cu bo a pag’e ora. Pero e no kier haci esey,” Wever-Croes a remarca.

CAft: Aruba a cera 2025 cu surplus fuerte, pero inversion di gobierno ta keda atras

Aruba a termina 2025 cu un surplus presupuestario fuerte y un debe publico bahando, segun Colegio di Supervision Financiero (CAft). E organo di supervision ta bisa cu e resultadonan ta muestra cu finanzas publico di e pais a mehora, pero na mesun momento a adverti cu inversionnan di gobierno ta sigui keda atras y cu e asunto aki mester ser atendi.

CAft a comparti su evaluacion despues di a revisa e di cuater Uitvoeringsrapportage (UR) di Aruba pa 2025. A base di e rapport, CAft a conclui cu Aruba a cumpli cu tur dos regla fiscal clave estableci bou di e Ley di Supervision Financiero di Aruba (LAft).

Sector colectivo a registra un surplus di financiamiento preliminar di Afl. 481 miyon, igual na alrededor di 6% di e producto interno bruto (GDP) di Aruba. E resultado ey ta hopi riba e norma fiscal di 1% di GDP, indicando cu finanzas di gobierno tabata significativamente mas fuerte cu tabata necesario.

Na mesun momento e debe publico di Aruba a sigui baha. Pa fin di 2025, e debe total di e pais tabata Afl. 5.125 biyon, of 64% di GDP. Esaki ta representa un mehoracion compara cu 69% di GDP na 2024.

Segun CAft, e tendencia abao ta nifica cu Aruba ta riba bon caminda pa cumpli cu e meta legal di reduci debe publico na 50% di GDP prome cu 2040.

Mientras organo di supervision a yama bon bini na e mehoracionnan aki, el a enfatisa cu resultadonan fiscal fuerte so no ta suficiente. Tambe Aruba mester percura pa e fondonan disponibel ser usa efectivamente, specialmente pa proyectonan di infraestructura y desaroyo.

Gobierno di Aruba mes a registra un surplus di financiamiento di Afl. 285 miyon na 2025. E resultado aki tabata mucho mas halto cu a premira anteriormente. Compara cu e di dos amienda di presupuesto pa 2025, e resultado financiero di gobierno a mehora cu alrededor di Afl. 150 miyon.

E resultado mas fuerte a bin di un combinacion di entradanan un poco mas halto y gastonan di gobierno mas abao cu loke a ser planea. Ademá gobierno no a gasta e suma completo cu a ser presupuesta pa proyectonan di inversion.

Entradanan di gobierno a alcanza Afl. 1.928 biyon na 2025, un aumento di Afl. 55 miyon compara cu 2024. E entradanan tambe a drenta mas o menos Afl. 12 miyon mas halto cu loke a proyecta den e ultimo revision di presupuesto.

Impuestonan indirecto — manera impuesto riba benta y invoerrechten — a funciona particularmente bon. E entradanan aki a subi cu Afl. 65 miyon compara cu e aña anterior, reflehando un actividad economico mas fuerte.

Impuesto riba entrada di empresa tambe a muestra un aumento notabel. E entradanan di impuesto riba ganashi a alcanza Afl. 248 miyon, cu ta alrededor di 18% mas halto cu na 2024. E crecimiento aki ta mara pa gran parti na condicionnan economico faborabel.

Sinembargo, no ta tur entrada di impuesto a subi. Entrada for di impuesto riba salario a baha drasticamente despues cu gobierno a reduci e tarifa di impuesto na comienso di 2025. E entradanan di impuesto riba salario a suma Afl. 210 miyon, cu ta Afl. 55 miyon mas abou cu na 2024.

Gobierno a anticipa un bahada di alrededor di Afl. 50 miyon, loke ta nifica cu e resultado tabata cerca di loke e trahadornan di politica a anticipa.

Gastonan total di gobierno a alcanza Afl. 1.628 biyon na 2025, cual ta Afl. 50 miyon mas halto cu na 2024. Sinembargo, e gastonan tabata Afl. 88 miyon mas abou cu loke a presupuesta, contribuyendo significativamente na e surplus presupuestario.

Gastonan di personal a keda e gasto di mas grandi den presupuesto di gobierno. Na 2025, e gastonan di personal a suma Afl. 498 miyon, cu ta conta pa alrededor di 8.1% di GDP. Esaki ta representa un aumento di Afl. 29 miyon compara cu 2024, pero e nivel ta keda hopi bou di e limite maximo estableci den e cuadro fiscal.

E cantidad di empleadonan di gobierno tambe a baha un poco. E cantidad total di posicionnan ekivalente na tempo completo a baha di 3.402 na 2024 pa 3.345 na 2025.

Segun CAft, actualmente Aruba ta cumpli cu e limite di gasto di personal di 10% di GDP, un regla cu lo drenta na vigor oficialmente na 2027.

Asina mes, CAft a adverti cu mester sigui mancha gastonan di personal cuidadosamente. Factornan manera aumento di salario y un forsa laboral cu ta embehece por pusha gastonan mas halto den futuro.

Aunke e resultadonan financiero ta aparece fuerte, CAft a señala cu parti di e surplus grandi ta debi na gastonan di inversion cu no a tuma lugá manera planea.

Na 2025, gobierno a inverti solamente Afl. 30 miyon, aunke Afl. 74 miyon a ser aloca den e presupuesto. Esaki ta nifica cu solamente alrededor di 40%

di e inversionnan plania a ser realiza realmente.

CAft a bisa cu esaki no ta un asunto di un solo biaha sino un problema estructural cu a sucede ripetidamente den e ultimo añanan.

Varios factor ta contribui na e retrasonan aki. Hopi biaha instancianan di gobierno ta enfrente retonan cu preparacion di proyecto, proceduranan di adkision y capacidad administrativo. Como resultado, proyectonan di inversion ta ser posponi of ehecuta hopi mas laat cu plania.

Segun e organo di supervision, mehoracion di planificacion y ehecucion di inversionnan publico mester ta un prioridad pa gobierno.

P'esey CAft a recomenda pa Aruba desaroya un agenda di inversion di varios aña. E plan aki mester ta inclui den e prome amienda di presupuesto pa 2026. Un estrategia asina lo yuda gobierno identifica proyectonan di prioridad mas trempan y mehora preparacion y ehecucion. E lo yuda tambe pa garantisa cu e fondonan aloca pa proyectonan di desaroyo ta ser usa realmente.

Sin mehoracionnan asina, CAft a adverti cu metanan di politica no por ser alcanza hasta si tin recursonan financiero disponibel.

Debi cu e gastonan di inversion tabata consistentemente mas abao di loke a ser plania, CAft a conseha gobierno pa usa un parti di e surplus pa reduci e debe publico mas lihe. Baha debe lo reduci gastonan di interes y fortifica Aruba su estabilidad financiero a largo plaso.

Na 2025, Aruba a debolbe Afl. 535 miyon na prestamo, un tiki mas cu e Afl. 534 miyon originalmente plania. E pagonan aki a inclui Afl. 206 miyon na prestamo domestico y Afl. 328 miyon na prestamo den exterior. Sinembargo, mayoria di e pagonan aki a ser fiancia door di emiti fianza nobo. Como resultado, e reduccion total di debe publico tabata limita.

CAft a subraya cu sigui cu e tendencia abao den debe publico ta keda esencial pa salud financiero di Aruba.

Sector colectivo mas amplio — cu ta inclui institutonan publico manera AZV, SVb y ATA, tambe a registra resultadonan financiero fuerte. Hunto, e entidadnan aki a informa un surplus combina di Afl. 481 miyon na 2025, un poco mas halto cu e Afl. 477 miyon registra na 2024.

AZV a raporta un surplus di Afl. 112 miyon, cu ta mas halto cu tanto e proyeccion di presupuesto como e aña anterior. Mientras tanto, SVb a registra un surplus di Afl. 78 miyon, par-



cialmente debi na contribucionnan mas halto pa programanan di seguro di pensioen y sobrevivencia. E resultadonan fuerte aki di institutonan publico a yuda pusha e surplus di sector colectivo en general na un nivel record.

A pesar di e resultadonan fiscal positivo, CAft a enfatisa cu gobierno mester finalisa ainda e definicion oficial di sector colectivo di Aruba pa 2023 y añanan despues.

E composicion di e sektor colectivo ta determina cual institutonan publico ta ser inclui ora di calcula finanzas di gobierno y debe publico.

Ministerio Hulandes di Interior y Relacionnan den Reino a propone pa harmonisa e forma con Aruba, Corsou y Sint Maarten ta defini nan sectornan colectivo. Actualmente Aruba ta trahando hunto cu CBS Aruba y Hulanda pa mehora e proceso aki. CAft a urgi gobierno pa completa e trabou aki mas pronto posibel, señalando cu un definicion cla ta necesario pa garantisa un reportahe exacto di e posicion fiscal di e pais.

Tambe e CAft a tuma nota di mehoracionnan den e administracion financiero di Aruba. A atende cu e atraso den reportahe, y varios jaarrekening pendiente a ser entrega. Jaarrekening di 2019 di gobierno a ser entrega na Parlamento, mientras cu jaarrekening di 2020 a ser entrega na Algemene Rekenkamer Aruba (ARA) pa revision. Jaarrekening di 2021 te cu 2024 tambe a ser entrega na e ARA.

Segun CAft, e pasonan aki ta representa progreso importante den direccion di mehoracion di transparencia y manejo financiero.

E perspectiva fiscal di Aruba ta aparece positivo, sosteni pa entradanan fuerte y mehoracion di condicionnan economico. Sinembargo CAft a subraya cu gobierno mester sigui mancha finanzas publico cuidadosamente mientras tambe ta mehora e ehecucion di proyectonan di inversion.

Prijs di petroleo ta surpasa \$100 pa bari:

Crisis den Medio Oriente ta sacudi mercado di energia cu posible efecto pa Aruba

Mercadonan mundial di azeta a ser sacudi den e ultimo simannan despues di un escalacion fuerte di tensionnan entre Merca, Israel y Iran. Atakenan militar dirigi riba infraestructura di azeta na Iran y atakenan di represalia den henter e region a causa miedo di interrupcion di suministro, aumentando prijs di azeta crudo significativamente y lantando preocupacion tocante consecuenan economico rond mundo. Pa economianan insular chikito cu ta depende hopi di combustibel importa, manera Aruba, e aumento den prijs di petroleo lo por traduci su mes den gastonan di energia mas haltu y un presion economico mas amplio den e lunanan binidero.

Prijs di azeta a subi drasticamente despues di informenan cu forsanan Mericano y Israeli a lansa atakenan coordina riba varios punto militar y relaciona cu energia Irani, incluyendo facilidatnan di almacenamento di azeta y reservanan strategico. Iran a responde cu atakenan di represalia dirigi riba infraestructura di energia den otro partinan di Medio Oriente, incluyendo instalacionnan liga na produccion y almacenamento di azeta. E escalacion a aumenta e preocupacionnan tocante e seguridad di suministro di energia mundial, particularmente pasobra gran parti di e produccion di azeta mundial ta concentra den e region di Golfo.

Prijs di azeta crudo a subi rapidamente riba e limite simbolico di \$100 pa bari despues di e atakenan, cu algun analista di mercado advertiendo cu prijsnan por sigui subi si e conflicto stroba exportacion for di e region pa un periodo extendi. Mercadonan di energia tin e tendencia di reacciona fuertemente riba tensionnan geopolitico den areanan cu ta produci azeta, ya cu hasta e menasa di interrupcion di suministro por hisa prijsnan mas haltu.

Un di e preocupacionnan central pa mercadonan mundial ta e Estrecho di Ormuz, un canal di awa smal entre Iran y e Peninsula Arabe a traves di cual mas o menos un quinta parti di e suministro di azeta mundial ta pasa tur dia. Tankeronan cu ta transporta azeta crudo di productornan grandi manera Saudi Arabia, Iraq, Kuwait y Emiratonan Arabe Uni ta depende di e estrecho pa alcanza mercadonan mundial.

Desde e escalacion di e conflicto, trafico di tankero den e region a baha significativamente memey di miedo di atakenan di misil y confrontacion militar. Companianan di envio y aseguradonan a bira mas y mas cauteloso tocante operacion den e area, mien-



tras cu algun pais segun informe a ahusta rutan di exportacion of a reduci envionan temporalmente. Hasta interrupcionnan chikito den e canal aki por tin efectonan grandi riba prijsnan di energia mundial.

Ademas di e preocupacionnan tocante rutan di barco, e atake directo di infraestructura di azeta a intensifica e incertidumbre den e mercado. Atakenan aereo riba facilidatnan di almacenamento y infraestructura di energia por tuma siman of lunanan pa drecha, dependiendo di e grado di e daño. Terminalnan di almacenamento, tuberian y refinarianan ta sistemanan compleho cu ta rekeri ekipo y ingenieria specialisa pa restaura unabes cu nan a ser daña pa atakenan militar.

Expertonan di energia ta bisa cu e liña di tempo pa recuperacion lo depende pa gran parti di con largo e conflicto ta sigui y con extenso e daño ta. Si e hostilidadnan alivia lihe y infraestructura di energia por ser drecha sin retraso grandi, mercadonan di azeta por estabilisa dentro di algun siman. Sinembargo, si e conflicto sigui of plama pa areanan adicional cu ta produci azeta, e interrupcion por dura mucho mas largo.

Den caso di facilidatnan grandi di almacenamento di azeta, reparacionnan por dura varios luna pasobra reconstruccion di tanki y tuberianan daña ta rekeri materialnan specialisa y inspeccionnan di seguridad. Refinerianan por tuma mas tempo pa restaura, particularmente si unidatnan di procesamiento critico ta daña. Durante e periodo ey, e capacidad di produccion y exportacion por keda limita, manteniendo presion riba prijsnan di azeta mundial.

Fuera di e daño fisico na infraestructura di energia, e conflicto tambe a introduci un "prima di riesgo" geopolitico den mercadonan di azeta. Comerciantenan hopi biaha ta aumenta prijs ora tensionnan geopolitico subi pa motibo di incertidumbre rond di interrupcionnan di suministro den futuro. Hasta si e perdidanan di produccion real ta keda limita, e riesgo

percibi di scarsedad di suministro por subi prijsnan.

Prijsnan mas haltu di azeta tin e tendencia di cambia den e economia mundial pasobra productonan di petroleo ta hunga un rol central den transporte, generacion di coriente y produccion industrial. Ora azeta crudo bira mas caro, gastonan di combustibel, envio y fabricacion tipicamente ta aumenta tambe. E gastonan creciente aki por afecta prijsnan di consumidor eventualmente, contribuyendo na un inflacion mas amplio.

Pa Aruba, e consecuenan di aumento di prijs di petroleo lo por ta particularmente notabel. E isla ta depende hopi riba combustibel fosil importa pa alimenta su economia. Aunke Aruba a haci progreso den desaroyo di fuentenan di energia renobabel manera energia di biento, un gran parti di e generacion di coriente di e isla ainda ta depende di fuel oil. Como resultado, fluctuacionnan den prijs di azeta mundial por afecta directamente e costo di produccion di coriente.

Debi cu Aruba no ta produci petroleo domestico, tur producto petrolero mester ser importa for di proveedornan internacional. Ora prijs di azeta mundial subi, e gasto di importacion di combustibel ta aumenta, y e aumentonan aki eventualmente por ser refleha den prijs di combustibel domestico y gastonan di coriente.

Prijsnan di combustibel mas haltu por afecta bida diario na varios manera. Gastonan di transporte por aumenta segun cu gasolin y diesel ta bira mas caro. Gastonan di produccion di coriente tambe por subi si plantanan di coriente mester paga mas pa combustibel. Negoshinan cu ta depende di transporte, refrigeracion of operacionnan cu ta usa hopi energia por enfrente gastonan di operacion mas haltu, cu tin biaha por traduci den prijsnan mas haltu pa producto y servicio.

E sector di turismo, cu ta e pilar

economico di Aruba, tambe lo por sinti efectonan indirecto di e subida di prijs di petroleo. Aerolineanan ta entre e industrianan mas sensitivo na gastonan di combustibel, y prijsnan di combustibel di jet tipicamente ta move hunto cu prijsnan di azeta crudo. Ora gastonan di combustibel subi drasticamente, companianan di aviacion por ahusta prijs di pasashi of reduci frecuencia di vuelo pa asina compensa e gasto adicional.

Tarifanan di avion mas haltu por haci biahe di distancia largo mas caro pa algun bishitante, potencialmente influencia e demanda di biahe den cierto mercadonan. Liñanan crucero y companianan di envio di carga tambe por experiencia gastonan di combustibel mas haltu, loke por afecta gastonan di transporte pa tanto turista como mercancia importa.

Pa economianan insular chikito cu ta depende hopi riba importacion, aumento di gastonan di envio por aumenta e prijs di cuminda, material di construccion y otro productonan esencial. Esaki por pone presion adicional riba ciudadano y negoshinan cu ya ta tratando cu tendencianan di inflacion mundial mas amplio.

Segun cu inflacion ta subi, hogarnan di Aruba por haya cu gastonan di tur dia ta bira mas dificil pa maneha pasobra e mesun entrada ta cumpra menos bienes y servicio cu antes. Esaki por reduci poder di compra, haciendo mas dificil pa famianan cubri gastonan esencial.

E trayectoria den futuro di prijs di azeta lo depende pa gran parti di con e situacion geopolitico ta evoluciona. Si esfuersonan diplomatico conduci na un reduccion di conflicto y infraestructura di energia por ser restaura lihe, mercadonan por estabilisa gradualmente. Economia grandi tambe ta mantene reservanan strategico di petroleo cu por ser libera durante interrupcionnan di suministro pa asina calma mercadonan.

Sinembargo, si e conflicto escala of plama pa paisnan productor di azeta adicional den e region, mercadonan di energia mundial por enfrente un periodo prolonga di volatilidad. Den un escenario asina, prijsnan haltu di azeta por pone un peso adicional riba economianan dependiente di importacion rond mundo.

Pa Aruba, desaroyonan miles di miya leu ta ilustra e naturalesa interconecta di e economia mundial di awendia. Conflictonan den regionnan grandi cu ta produci energia por influencia prijs di combustibel, gastonan di transporte y condicionnan economico lihe hasta den nacionnan insular leu.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figuereo (closer editor)

Leo Maduro

Dilma Arends

Raisa Montilla

Oriana Geerman

Ehecutivo di Benta

Sulaika Croes

sulaika.croes@cspnv.com

Mark Gomes

mark.gomes@cspnv.com

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion

accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)

Pablo Libre

Press

Roland Schenker (Hefe)

Omar Ramirez

Martin Boekhoudt

Francis Dirksz

Colaboracion

Associated Press

Ret Karibense

Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22

Tel: 582-7800

Email: noticia@bondia.com

aviso@bondia.com

info@bondia.com

Website: www.bondia.com

Facebook: @bondianoticia

Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Crisis na Medio Oriente... Yegando na nos porta...

Situacion internacional politico y economico desde algo mas cu un siman ta muestra riba un periodo di instabilidad grandi y consecuentemente poco desarrollo economico positivo. E guerra inicia pa Merca y Israel contra Iran ta parce di no bira un 'accion relampago' manera na Venezuela, sino uno cu pa e propio caracteristicanan di e pais ataca, por afecta mundo completo. Un di e señalnan ta cu parti faltante y importante di e fluho di crudo a causa cu prijs di crudo a surpasa \$95 pa bari caba, cu perspectiva pa subi den direccion di \$150 pa bari. Pa duna cierto referencia, e siman anterior ainda, y durante luna di januari y februari di e aña aki, prijs di crudo Mericano 'benchmark' (WTI; West Texas Intermediate) tabata bao di \$70 pa bari. E promer pensamiento ta cu prijs di gasolin y diesel ta subi exorbitantemente. Esey na e momento aki na hopi pais ta visible caba. Pero esey no ta tur; si no bin un paro di e hostilidadnan pronto, e prijs exagera di combustible ta cuminsa pasa den practicamente tur proceso y cadena economico. Por ehemplo, prijs di transporte y uso di maquinaria den agricultura ta percura pa aumento di prijs di producto agricola en general. Ademas, produccion di fertilizante cu ta depende di producto procedente di refinacion di crudo ta mira igualmente prijs mas halto, añadiendo na e aumento di prijs agricola ya menciona. Transporte en general lo keda afecta, causando costo mas halto den practicamente tur sector. Esaki ta conta tambe pa aviacion, unda lo mira pronto un aumento considerable di prijs di ticket aereo.

Ya por scucha o lesa e promer comentarionan cu e crisis actual por ta esun mas grave desde e crisis di petroleo di 1973, mas di 50 aña pasa. Esnan di e edad mas avanza lo ta corda e 'diadomingo sin auto' cu a keda introduci na varios pais pa por enfrenta escasez di combustible e tempo ey. Aunke no necesariamente e situacion lo yega na tal gravedad, ta importante repasa e puntonan unda nos pais por keda afecta. Pa cuminsa, prijs di gasolin y diesel lo afecta practicamente tur ciudadano, mas ainda pasobra tur hende ta depende di transporte, sea priva o publico. Tambe nos sistema di produci energia electrico, y relaciona cu esey tambe produccion di awa, ta depende pa mas di 80% di combustible, mas tanto den forma di 'heavy fuel oil' (HFO), cu tambe lo conoce aumento similar. Esaki lo afecta tambe prijs di awa. Banda di tur esaki ta bin e aumento inevitable di prijs di tur loke nos ta importa, y ya cu solamente biento ta yega gratis, y no tur ora tampoco, e consumidor en general lo bay sinti esaki.

Turismo?

Nos sector economico principal tambe por anticipa problema. Combustible mas caro lo afecta prijs di biahe aereo y maritimo, loke por afecta yegada di turista. Pero riba esey lo haya tambe prijs mas halto pa tur loke nos ta importa, mescos manera pa e ciudadano ya menciona. Aruba tin un problema caba di ta un destinacion bastante caro den nos region y e crisis por haci esey mas grave ainda. Si turismo keda afecta, ta parce nos importante no solamente haci intento pa yega atrobe na e 1,5 miyon turista di 2025, posponiendo o lubidando e debate fundamental cu mester hiba tocante e 'sobrepoblacion turistico' cu ta afectando e calidad di turismo mes, loke finalmente lo afecta e sector di tur manera. Nos lo no ta e promer destinacion cu ta conoce un deterioro den calidad pa despues sufri e bahada den bishitante, pasobra nan ta mira mihor opcion na lugarnan menos yen di hende. Den e bida aki tin dos manera pa 'scale down': bo por hacie bo mes, o bo por warda pa realidad di bida bin hacie pa bo. Esaki ta e tipo di interrogante cu facilmente ta pone un banda den tempo di crisis, pero cu no lo desaparece.

Mientras situacion na Medio Oriente lo afecta nos tambe, sigur si e conflicto no termina pronto, atrobe surgie pregunta: con bon nos ta prepara pa esaki? Pa casualidadtin discusion den e dianan aki tocante nos situacion financiero y e supervision financiero cu a yega na e fase cu e propuesta di ley di Reino por bay pa Raad van State pa consejo, pa despues sigui su caminda pa parlamento Hulandes. Si e proceso cana normal, loke ta tuma su tempo, por ta cu e crisis actual ya ta haciendo e daño, pa cual nos mester tabata mihor prepara caba, y no ta... Esaki no ta un asunto cu ta toca e ley di supervision so, sino tambe e otro reformanan den gobernacion cu a cana segun paso di morocoy desde 2020, pa awor atrobe un posible crisis severo yega na nos porta, cu mayoria di asunto keto bay sin regla. Y pa cuanto cu nos gobernantenan gaba e bonanza relativo di e recuperacion despues di e pandemia, awor por mira con relativo tur esey tabata. Gran parti di e beneficianan gubernamental a bay pa paga debe, manera mester ta, y e algo mas di 100 miyon di surplus cu nos lo haya e aña aki, si e actual crisis no a presenta, lo evaporea rapidamente. Esaki pasobra ingreso gubernamental lo ta cayendo y gastolo ta aumentando, pasobra nivel general di prijs ta afecta gobernacion tambe. Talvez esaki ta un bon momento anto pa nos gobernantenan realiza con insignificante e pleito eterno tocante supervision tabata, mientras cu esaki a stroba preparacion pa e siguiente golpi cu ta warda nos awor.

Aruba a reforsa su colaboracionnan strategico na Europe durante ITB Berlin 2026

Aruba Tourism Authority (A.T.A.) a tuma parti activamente na ITB Berlin 2026, e feria di turismo mas grandi di mundo, caminda ta enfoca riba fortalece e posicion como un destinacion di calidad, cu enfasis riba conectividad aereo, colaboracion cu e industria y como parti di e strategia di diversificacion, un crecimiento balansa y sostenibel.

Manera A.T.A. a indica den un comunicado di prensa, Europa ta un mercado clave den e strategia di diversificacion pa Aruba su turismo. Pa e motibo aki, e obhetivo e aña aki ta pa sigura cu e crecimiento di 2.7% visitor arrivals cu a realisa na 2025 compara cu 2024, por continua den un manera sostenibel mientras cu ta sigui enfoca riba e segmento afluente den e diferente paisnan.

Durante e feria, e delegacion a consisti di ehecutivonan di A.T.A., AHATA y 11 representante di diferente hotel y DMC di Aruba. Conhuntamente a sostene un programa intensivo di reunionnan cu partnernan clave di e industria di turismo na Europa.



E delegacion a reuni cu diferente empresanan entre otro e aerolinea Suizo Edelweiss, DERTOUR di Alemania, VING (Nordic Leisure Travel Group) di Scandinavia, Knecht Reisen di Suiza, Alpitour di Italia, e aerolinea Arabe Qatar Airways y otro operadornan di tour y representantenan di mercado Europeo.

Na aña 2025, Aruba a conoce un aumento di 2.7% den cantidad di turista for di Europa den comparacion cu 2024. Pa sigura un crecimiento sostenibel enfocando ariba bishitantenan afluente, un tema central den varios

di e combersacionnan tabata conectividad aereo. Den e reunion cu Edelweiss a sigui analisa e desaroyo di e mercado Suizo y e posibilidad di un vuelo directo for di Zurich pa futuro, teniendo cuenta cu condicionnan operacional, demanda y planificacion di flota. Edelweiss a indica cu Aruba ta sigui forma parti di e destinacionnan cu ta considera! Despues cu A.T.A. y AAA a acerca, a reuni varios biaha y a presenta e "business case y proposicion" concreto. Partidonan ta sigui traha riba e ruta importante aki. Cu Qatar Airways, e dialogo a enfoca riba Aruba su posicion den e red global di conectivi-

dad via Doha, caminda mayoria di trafico ta conecta cu mercadonan manera Medio Oriente y Asia conectando cu Norte y Latino America. Pero, teniendo na cuenta reto actual di disponibilidad di aeronavenan.

E ekipo di A.T.A. a reuni cu KLM na Hulanda pa explora e posibilidad di expansion di nan capacidad pa Aruba. Especialmente pa introduci mas capacidad den Business Class y nan producto di Premium Economy. Porfin por confirma cu lo cambia e flota pa Aruba y Aruba lo tin mas stoel di categoria Business Class & Premium. Tambe ta sigui ahusta pa asina captura e oportunidadnan cu tin pa crece conhuntamente den e mercadonan secundario manera e paisnan Nordico, Alemania, Italia y Reino Uni. Den e reunionnan cu DERTOUR kende ta e lider den benta na Alemania pa Aruba, a elabora riba e prestacion fuerte di nos isla den mercado Aleman, un mercado cu a crece cu 13.5% na 2025. E combersacionnan a inclui oportunidadnan pa intensifica e colaboracionnan y activacionnan dentro di nan red di aproximadamente 10.000 agente di biahe.

experiencia mas personalisa por medio di combina Aruba cu destinacionnan den Latino America manera Peru y Argentina.

Den reunionnan cu Alpitour, e operador di tour principal di Italia pa Aruba, a evalua e resultado di cooperacion actual y e potencial pa sigui crece den futuro a pesar di no tin vuelo directo. Aruba tin un posicion fuerte na Italia como destino pa Honeymooners. Pa e segmento aki e biahenan cu ta combina entre otro Norte America y Latino America ta representa aproximadamente 45% di tur yegada Italiano na Aruba. Durante e reunion a presenta tur e posibilidadnan nobo danki na e expansion actualmente den vuelonan di Latino America, specialmente e ruta di Lima pa Aruba.

Sostenibilidad y turismo balansa

Den linea cu e tema di ITB Berlin 2026, 'Leading Tourism into Balance', CEO di A.T.A. Ronella Croes a comparti e enfoca riba sostenibilidad, incluyendo e importancia di data, certificacion y uzo responsabel di recurso-nan. Den conversacionnan y entrevista cu medionan di comunicacion y partnernan di e industria, e necesidad di un enfoca mas coordina pa sostenibilidad den turismo a wordo destaca. A comparti entre otro e colaboracion strategico cu Aruba Conservation Foundation (ACF) unda conhuntamente ta traha entre otro riba e comunicacion pa conscientisa nos huespednan. E 'Aruba Promise' y e campaña global nobo cu ta carga e lema When you love Aruba, It loves you back tambe a forma parti di dialogo cu prensa internacional.

"ITB Berlin ta sigui ta un plataforma esencial pa Aruba pa profundisa relacionnan cu nos partnernan, discuti reto y oportunidadnan y traha hunto riba un futuro sostenibel pa turismo," segun Aruba Tourism Authority. "E reunionnan a confirma cu, a pesar di un mercado global cu reto, Aruba ta wordo mira como un partner serio, confiable y atractivo." Cu presensia na ITB Berlin 2026, Aruba ta reafirma su compromiso cu e mercado Europeo.

Cu VING / Nordic Leisure Travel Group e enfoca tabata riba crecimiento for di e mercadonan Nordico, esta Suecia, Noruega, Dinamarca y Finlandia. Den pasado Aruba tabatin vuelo directo for di Suecia, pero despues di pandemia e mercadonan no a logra recupera exitosamente compara cu otro paisnan. Na 2025 tur 4 pais a duna un resultado positivo di yegada pa Aruba. E base fuerte aki a bolbe lanta e interes pa fortalece cooperacion y analisa posibilidadnan pa vuelo directo den futuro.

Reunionnan cu Knecht Reisen a enfoca riba e posicion competitivo di Aruba den mercado Suizo. E mercado aki ta un bon ehempel di e strategia di 'value over volume'. Aunke e cantidad di turista Suizo ta relativamente chikito, e balor averahe di cada booking ta bastante halto. Pa Knecht Reisen esaki ta mas o menos 17.000 Franco Suizo pa cada booking. Den ausencia di vuelo directo a explora oportunidadnan pa sigui adapta e oferta di Aruba pa un publico cu ta busca



WE'RE HIRING

CHEF

LINE COOK - KITCHEN HELPER

**EXPERIENCED
PASSIONATE
ENERGETIC
CUSTOMER FOCUSED**



send your CV to casatuaexecutive@gmail.com

AWA

MINI MEGA

MEGA PLUS

Awo cu 2 florin mas, bo por gana e

*** Afl. 420.000,-**

* Afl. 300.000,- + Afl. 120.000,-
extra

Benta ta sera 7:30 pm y sorteo ta hunga 7:45 pm

MEGA PLUS



HUNGA AWO

f

X

Instagram icon

YouTube icon

Lotto icon

Morto na yegada: E sistema di salud devastador na Sur Sudan

(AFP)—E sistema di cuido medico na sur Sudan a deteriora pa años di corrupcion cu ora un gobernador estatal a haya presion haltu recien, e mester a bula pa Kenia pa haya tratamiento.

Riek Gai Kok ta e gobernador di estado Jonglei, unda conflicto a estaya entre gobierno y partidonan di oposicion.

Su biahe pa Nairobi a ser reporta pa humanitario como un otro ehempel di con e elite di Sur Sudan, considera esun mas corrupto na mundo pa Transparency International, a permiti servicionan den e pais pa collapse.

Mientras e pais ta dreitando back den guerra civil entre partidonan rival, e tiki cuido medico cu ta existi ta casi full via donantenan stranhero, cu mas di 80% duna pa ONGonan manera e Comité Internacional di Cruz Cora (ICRC) y Dokternan Sin Frontera (MSF).

Den un hospital den e capital Juba, un soldad a conta AFP cu e tabata asombra di a ser traslada via helicopter pa hospital mirando cu mayoria herida ta ser laga pa muri. “Ora nan a tira mi, mi a kere

mi a muri,” segun Ajoung Deng, 33, herida na pia.

Pero tabata ICRC cu a rescat’e—no gobierno ni e ehercito—tratando e na nan facilidad dentro di e Hospital Militar di Juba unda e NGO ta duna personal loke e ta yama “incentiva” pasobra e no ta permiti oficialmente pa paga nan.

“Si nos no paga nan e ora ningun hende ta keda,” segun un trahador, papiando anonimamente. Pago di gobierno, normalmente 10-15 dollar pa luna, no a yega den varios luna.

“Esaki no ta kico nos mester ta haciendo,” segun un humanitario senior.

Ciclo di violencia

Den e hospital Jubal, heridanen ta drumi riba vloer bisti den verband cubri di sanger. Un homber tira den nek no por a haya rosea bon.

E empleadonan tabatin miedo cu e hombernan aki lo cay back den e multiple ciclo di violencia: e guerra entre gobierno y oposicion, actualmente andando den e norte, of entre milicianan etnico y asaltantenan di cria cu ta pl-



aga areanan rural.

“Mi a haya un pashent cu a bin cuatro biaha,” segun Angeth Jervas Majok, e psicoterapeuta principal di ICRC. “Na di cinco biaha, desafortunadamente el a fayece.”

Cu apenas 300 kilometer di caminda cu asfalt, hopi di nan cu ta keda blokea durante temporada di yobida, heridonan sa haya infeccion prome cu nan por alcanza un dokter, pues amputacion ta comun. Pero nan ta enfrenta

stigma: “Tin un creencia cu amputadonan no ta ser humano mas,” segun Majok. “Hopi pashent no por bay cas mas.”

Gobierno no kier bisa cuanto soldad a muri mientras combatimento a aumenta durante e ultimo año.

E Organizacion di Nacionnan Uni (UN) ta bisa cu mas di 5.100 civilnan a ser asesina y shen miles desplasa, y a adverti cu Sur Sudan ta na punta di “un guerra civil total.” E ultimo den añanan 2010 a mata 400.000 hende.

‘Retonan’

Mientras cu gran parti di Oost Africa ta mirando mehoracion den cuido medico, Sur Sudan ta bayendo e otro caminda a pesar di ricibi 1,4 biyon dollar den ayudo di afo na 2024, e suma mas grandi globalmente como parti di GDP.

Expectativa di bida ta 58 año, segun Banco Global, sin mira mehoracion desde independencia na 2011. Mortalidad materno ta 1.223 pa cada 100.000 nacemento, compara cu 197 globalmente. Unicef ta bisa cu un den 10 mucha no ta yega cinco año di edad.

E ganashi di petroleo di Sur Sudan a surpasa 25 miyon dollar desde 2011, pero apenas 1% di e presupuesto di e año aki a ser aloca na salud publico y UN a bisa cu “un suma grandi nunca ta yega e sector, lubida e poblacion” den un pais unda 92% ta biba bao liña di pobresa.

Ademas di esey, Sur Sudan ta entre e paisnan mas peligroso na mundo pa ta un trahador di salud. Facilidadnan di MSF a ser ataca 11 biaha durante e ultimo año. E unidad quirurgico di ICRC tin porta pa mitiga explosion y ta warda buscuchi y awa banda di equipaje medico den caso di un redada.

Merca a adverti cu e lo stop su financiamiento si gubernacion no mehora, y ONGonan ta retirando mientras donacion ta cayendo y pasenshi ta cabando cu lidernan Sur Sudan.

Minister di Informacion Ateny Wek Ateny a admiti na AFP cu tabatin “retonan” di likides pero a bisa cu gobierno ta trahando riba dje. El a rechasa e rapport mas recien di Transparency International, bisando: “Mi no sa ki criteria nan a usa pa clasifica Sur Sudan como e pais mas corrupto na mundo.”



Conseho Asesor ta cuestiona propuesta di reforma di pension pa motibo di riesgo financiero

(Curacaochronicle) - Raad van Advies Curaçao a expresa preocupacion serio tocante un propuesta parlamentario pa cambia sistema di pension di pais, advertiendo cu impacto financiero di e plan ainda no a ser calcula suficientemente.

Den un opinion asesor entrega na Parlamento di Corsou, conseho a examina un iniciativa legislativo cu ta busca modifica leyman cu regula pension di behes nacional y sistema di pension pa sobrevivientenan.

Propuesta ta busca cambia

metodo usa pa ahusta beneficio di pension anualmente y introduci un pension adicional pa residente mayornan cu ingreso abao.

Segun conseho asesor, e iniciativa ta reconoce necesidad di accion di gobierno, ya cu beneficio di pension no a ser indexa pa varios aña. Sinembargo, e organo asesor ta adverti cu consecuencia financiero di e cambionan proponi ainda ta poco cla y no ta sosteni pa calculacionnan detaya. Conseho a indica cu cualkier reforma legislativo cu afecta beneficio di pension por pone un carga significa-

tivo riba finanzas publico si fondo di pension of fondo di reserva no ta capaz di cubri e costonan.

Segun marco legal di Corsou, gobierno finalmente ta garantisa obligacionnan di Sociale Verzekeringsbank (SVB), lo cual ta significa cu cualkier deficit por cay riba e presupuesto nacional. Conseho asesor a conclui cu e propuesta actualmente no ta cumpli cu e normanan rekeri pa responsabilidad financiero y a conseha Parlamento pa reconsidera avansa cu e proyecto den su forma actual.



Gobierno di Corsou a aproba plan pa fortalece preparacion pa crisis geopolitico

(Curacaochronicle) - Gobierno di Corsou a aproba un plan di politica cu ta busca fortalece preparacion di isla pa posible crisis geopolitico y nacional.

E plan, titula "Maneho di Crisis pa Menasanan Geopolitico", ta exigi cu ministerionan y institucionnan gubernamental actualisa nan plan di emergencia pa enfrente posible escenario manera gran fluho di refugiado for di region, interrupcion den suministro di energia of cuminda, ciberatake y faya den infraestructura critico.

E iniciativa ta cay bao responsabilidad di Ministerio di Asunto General di Corsou y ta alinea cu e marco legal di pais pa maneho di desaster y reaccion riba crisis.

Preparacion pa instabilidad den region

Un di e scenarionan menciona den e politica ta inclui un aumento repentino den migracion for di paisnan bisindario causa pa instabilidad politico of economico.

Den situacionnan asina, gobierno kier sigura cu responsabilidadnan ta defini claramente pa servicionan cu ta involucra den recepcion, registracion, control di frontera y mantencion di ley y orden.

Autoridadnan tambe ta examinando unda por establece facilidadnan temporal di recepcion si ta necesario.

Proteccion di infraestructura critico

Otro punto importante di e politica ta proteccion di infraestructura vital.

E plan ta describi con institucionnan di gobierno y servicionan di emergencia mester reacciona si sistema impor-

tante ser interumpi. E scenarionan aki ta inclui recorte di coriente, cierre temporal di waf of aeropuerto di isla, of ciberatake y sabotahe contra rednan di comunicacion.

Pasobra Corsou ta depende hopi riba importacion, e politica tambe ta considera crisis internacional cu por interumpi cadena di suministro. Den caso asina, autoridadnan lo mester determina rapidamente con reserva di combustible y cuminda mester ser maneha y cual sector

mester ricibi prioridad den distribucion.

Coordinacion central durante crisis

E plan tambe ta trata con institucionnan di gobierno mester opera durante un emergencia nacional.

Si un crisis serio sucede, por activa organizacion nacional di crisis. Ministerionan, polis, guardacosta y otro servicionan lo opera den un estructura di coordinacion

centralisa pa colecta informacion, implementa medidanan y comunica cu publico.

Implementacion di e politica lo ser coordina pa Directoraat Risicobeheer y Maneho di Desaster.

Director di DR, Lesley Fer, ta sirbi como coordinador nacional di crisis y lo supervisa alineacion di plannan di emergencia entre ministerionan y institucionnan di gobierno.

Prome Minister Pisas ta monitoria desaroyo den mercado di petroleo y posible impacto pa Corsou

(Curacaochronicle) - Prome minister di Corsou, Gilmar Pisas, a bisa cu gobierno ta sigui di cerca e desaroyonan reciente den mercado internacional di petroleo y e posible implicacionnan pa e isla.

Pisas, kende tambe ta responsable pa e sector di energia di isla, a declara diadomingo 8 di maart 2026 cu gobierno ta monitoriando situacion cu hopi atencion, ya cu prijs global di petroleo a subi considerablemente den e ultimo dianan pa motibo di tensionnan den Medio Oriente.

Prome minister a indica cu e ta keda den contacto estrecho cu Regulatory Authority of Curaçao (RAC) pa evalua si e situacion por afecta prijs local di combustible den lunanan cu ta bin.

Segun Pisas, ta importante pa publico comprende cu prijs di combustible na Corsou no ta cambia inmediatamente como reaccion riba fluctuacionnan den mercado mundial.

Tarifanan local di gasolin y diesel ta ser ahusta

mensualmente y ta basa, entre otro factor, riba prijs promedio di compra durante periodo anterior.

Na e momento aki, no tin indicacion cla cu prijs local di combustible lo cambia inmediatamente.

Sinembargo, prome minister a bisa cu gobierno lo sigui monitoria desaroyonan den mercado di energia y lo informa publico si tin cualkier implicacion pa costo di energia local, incluyendo tarifanan di electricidad y awa.



ANUNCIO/BLBA/010/26

Mediador di Gobierno na Aruba ta anuncia a base di articulo 1 inciso 2 di "Arbeidsvredebesluit 111" cu a ricibi e siguiente peticion, pa tene un Referendum bao di e empleadonan di e empresa menciona aki bao:

Number peticionario: "Sindicato di Trahadornan di Aruba (STA)"
Number EMPRESA: "Aruba Airport Authority N.V."

Ta pone atencion riba e posibilidad pa sindicatonan interesa, dentro di 14 dia despues di e fecha di e anuncia aki, trece nan deseo pa participa na dicho Referendum na conocimiento di Mediador.

Aruba 6 maart 2026
wnd Mediador di Gobierno
Mireille Meeuwisse

Inteligencia Hulandes ta confirma cu hackernan estatal Ruso ta purba ataca cuentanan di Dutch Signal y WhatsApp

(NLTimes) - Instancianan di inteligencia di Hulanda a confirma dialuna cu hackernan estatal Ruso ta purba di haya acceso na apps di combersacion Signal y cuentanan di WhatsApp rond mundo, incluyendo esnan di oficialnan di gobierno Hulandes, personal militar y otro individuonan di interes manera periodistanan. Segun informe, Signal ta particularmente un blanco pa motibo di su reputacion fuerte como un plataforma di comunicacion sigur cu gobiernonan ta usa.

Servicio General di Inteligencia y Seguridad Hulandes (AIVD) y Servicio di Inteligencia y Seguridad Militar



(MIVD) a bisa cu e hacker nan ta purba di obtene verificacion y codigonan PIN door di imita chatbotnan di sosten di Signal.

Unabes cu logra haya acceso, e atakantenan por lesa mensahenan manda na e cuenta y participa den gruponan di combersacion sin conocimiento di e usuario.

Hackernan tambe ta explota funcionnan cu ta permiti aparatonan pa ser conecta na cuentanan, loke por permiti vigilancia remoto.

Director-General di AIVD Simone Smit a enfatisa cu e menasa ta dirigi riba cuentanan individual enbes di vulnerabilidadnan tecnico den e plataformanan di mensahe

mes. “No ta asina cu Signal of WhatsApp como apps ta comprometi. E menasa ta dirigi riba cuentanan di usuarionan individual,” el a bisa den un declaracion.

Vice Almirante Peter Resink, director di MIVD, a adverti cu a pesar di encripcion di punta pa punta, aplicacionnan di combersacion manera Signal y WhatsApp no ta adecua pa informacion clasifica of sensitivo. Pa proteha contra intentonan di hacking Ruso, AIVD y MIVD a emiti un consejo cibernetico pa usuarionan.

E consejo ta recomenda pa usuarionan controla combersacionnan di grupo pa cuentanan sospechoso of duplica, verifica cualkier

cuenta inusual pa medio di email of telefon, y raporta preocupacionnan na e team di seguridad di IT di nan organizacion. Cuentanan comprometi mester ser kita for di combersacionnan di grupo.

E ta adverti tambe cu atakantenan por cambia nomber di cuentanan secuestra—por ehempel, pa “cuenta elimina”—pa evita deteccion. Cuentanan no-legitimo cu ta drenta un grupo via un link di grupo captura mester ser kita door di e administrador di grupo.

Si un administrador di grupo ta parce comprometi, miembronan ta ser conseha pa bandona e grupo y crea uno nobo.

Uso di banco di cuminda na Hulanda ta subi cu 7,5% pa 155.600 memey di aumento di costo di bida

(NLTimes) - E cantidad di hende cu ta usa banconan di cuminda na Hulanda a subi aña pasa te na 155.600, for di 144.750 na 2024, un aumento di alrededor di 7,5%. Un aña prome, e uso a baha.

Voedselbanken Nederland a bisa cu mas hende ta depende di ayudo di cuminda pa periodonan mas largo, aunke e sosten ta destina pa ta di termino cortico. “E principio ta cu e ayudo aki ta temporal: un periodo cortico di sosten pa asina hende por sigui independiente,” e organizacion a bisa.

E grupo a señala cu mas pensionado sin pensioen suplementario, trahador independiente, y otro personanan emplea cu no por cumpli cu nan necesidadnan ta buscando ayudo.

Henk Staghouter, presidente di Voedselbanken Nederland, a expresa su preocupacion tocante e plannan di seguridad social y cuido di salud di e gobierno nobo. “Mas hende lo tin dificultad pa cumpli cu nan necesidadnan pasobra nan beneficianan lo ser reduci of pasobra nan lo gasta mucho mas na gastonan di cuido medico. Nos tin mie-



do cu durante e periodo di gabinete binidero, pobreza na Hulanda lo subi mas como resultado, y hasta mas hende lo mester depende di ayudo

di cuminda,” el a bisa. Sindicatonan laboral CNV y FNV a adverti cu cambionan proponi na beneficianan di desempleo por empeora e

tension financiero pa hopi trahador. Bou di e plan di Gabinete Jetten I, e duracion di e beneficianan di desempleo lo baha di dos aña pa un, mientras cu e prome dos luna di pago lo subi di 75% pa 80% di e salarionan anterior, despues baha pa 70%.

Na februari, Voedselbanken Nederland a manda un carta pa tur lider di partido den Tweede Kamer, pidiendo un politica di pobreza cu no ta enfoca solamente riba participacion laboral y ta duna mas atencion na gruponan vulnerabel.

PM Hulandes no ta cla pa corta impuesto riba combustibel, mientras prijs di gas a subi cu 30%

(NLTimes) - Prome minister Rob Jetten ta vigilando e subida di prijsnan di gasolin y diesel, pero no ta mira ningun motibo ainda pa baha e accijns riba combustibel, el a bisa Nieuwsuur. E prome minister nobo di Hulanda a papia cu e programa di revista di noticia durante weekend, prome cu prijs di gasolin a subi cu 30% mas ora cu mercadonan a habri dialuna mainta.

“E ta impactante ora un guerra leu ta conduci na prijsnan mas halto na e pomp na cas,”

Jetten a bisa e programa. El a bisa cu gobierno tabata vigila e situacion y tabata haci “tur loke nos por” pa garantisar seguridad di suministro na Hulanda.

E prijs di benta recomenda pa un liter di gasolin ta actualmente mas o menos €2,39. E prijs recomienda pa diesel alcanza un record di €2,44 pa liter.

Gobierno Hulandes a corta accijns riba combustibel na april 2022 despues cu Rusia a invadi Ucrania y a causa un aumento fuerte den prijs di

azeta y, pues, di combustibel. Gobierno a prolonga e medida varios biaha, pero finalmente a aumenta e belasting riba combustibel di motor atrobe dia 1 di januari 2026.

Mientras tanto, e guerra na Iran ta bolbe aumenta prijs di azeta y gas. E conflicto no ta muestra señal di suavisa despues cu Merca y Israel a cuminsa ataca Iran mas cu un siman pasa.

Riba e intercambio di gas di Amsterdam, e prijs di gas a subi 30% pa aproximadamente 69 euro pa megawatt



pa ora na comienso di dialuna, ANP a informa.


El a sigui e prijs di azeta, cu a subi riba \$100 pa bari pa prome biaha for di zomer di 2022. Diadomingo, e prijs di

azeta di Merca, West Texas Intermediate (WTI) a subi 20% riba \$109 pa bari. Un bari di crudo Brent, e punto di referencia pa azeta di Medio Oriente, a subi 19% pa mas cu \$110.

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Gobierno di Asfura ta pidi revision di TPS pa Hondureñonan na Merca

(Infobae) - Gobierno di Honduras, lidera pa presidente Nasry Asfura, a enfatisa na autoridadnan di Merca urgencia di un revision nobo di e programa federal Temporary Protected Status (TPS), cual ta proteha residente Hondureño cu ta biba den teritorio Norte Americano y cu recientemente a ser afecta pa decisionnan hudicial.

Durante su discurso na un cumbre di aliado politico celebra na Miami, Asfura a confirma cu su administracion ta sigui haci gestion cu Washington pa logra un revision profundo di e programa, riba cual mas cu 55.000 Hondureño den Merca ta depende, segun e agencia internacional di noticia EFE.

Ademas, presidente Hondureño a expresa apoyo publico pa e coalicion militar lidera pa Merca pa combati cartelnan di narcotrafico y a afirma cu iniciativa lo fortalece seguridad y crea oportunidadnan di desaroyo den region. Asfura a destaca urgencia di revision di TPS despues di un fayo emiti na februari door di

United States Court of Appeals for the Ninth Circuit, e tribunal federal principal den west di Merca, cual a permiti gobierno federal avansa cu cancelacion di e programa pa migrantenan di Honduras, Nicaragua y Nepal.

TPS tabata concedi na Hondureñonan na 1998 despues di e horcan devastador Hurricane Mitch, y segun presidente Asfura tin beneficiario cu mas cu 26 aña di residencia na Merca, mientras algun persona tin te 35 aña bibando eyan.

Strategia nacional pa retene talento Hondureño

Riba tema di migracion, Asfura a adverti cu solamente inversion y creacion di oportunidadnan economico local por desanima migracion irregular y fuga di capital humano. "Na final di dia, loke nos ta busca ta con pa desaroya inversion y oportunidadnan di trabao na Honduras pa nos talento no bandona e pais y pa nos hende no mester bay traha na otro paisnan", presidente a declara.

El a indica cu el a presenta propuestanan specifico na senador Norte Americano

Marco Rubio tocante situacion di beneficiario Hondureño di TPS, insistiendo riba e necesidad di un evaluacion federal nobo den medio di fortalecimiento di sistema legal migratorio di Merca.

Merca ta propone uso di forsa militar letal contra cartelnan

For di e resort Trump National Doral Miami, propiedad di presidente Donald Trump, el a declara cu obhetivo central di e acuerdo ta usa "forsa militar letal pa destrui" cartelnan di droga. "Di un vez pa semper nos lo elimina nan. Nos tin mester di boso ayudo. Boso solamente mester bisa nos unda nan ta", Trump a declara, segun EFE a reporta despues di e reunion cu lidernan Latino Americano cu afinidad ideologico. Asfura a defini e reunion como un oportunidad pa fortalece cooperacion regional y a subraya importancia di alinea principio y interes entre paisnan participante, specialmente den e lucha contra narcotrafico y promocion di inversion.

"For di e reunion aki nos por



sinti cu nos tin un Merca mas uni, un Merca cu por cana den mesun direccion", el a declara.

Gobierno Hondureño tambe ta pone enfoke riba creacion di trabao y fortalecimiento di seguridad strategico como pilar central pa logra prosperidad y pa frena migracion iregular, un fenomeno estrechamente relaciona cu vulnerabilidad social y economico di e pais Centro Americano.

Honduras lo revisa acuerdo comercial cu China y evalua relacion cu Taiwan

Ademas, e presidente Hondureño a anuncia comienso di un proceso di revision di acuerdo firma cu China durante gobierno anterior di Xiomara Castro.

A pesar cu e no a especifica si gobierno ta considera distancia definitivamente for di Beijing pa reestablece relacion cu Taiwan, Asfura a enfatisa cu su administracion lo analisa cada acuerdo buscando "e miho condicionnan y e miho trato comercial" pa pais.

"Nos ta revisando e acuerdo entre e gobierno anterior y China, y mi ta ripiti: un presidente mester busca e miho alternativa pa pais y pa su pueblo", Asfura a declara.

Na maart di 2023, e administracion di Castro a corta relacion diplomatico cu Taipei pa establece relacion cu Beijing, un decision cu su consecuencia ainda ta ser evalua pa gobierno actual.

Gobierno di Guatemala ta fortalece medidanan pa mehora su calificacion di credito

(Infobae) - Gobierno di Guatemala ta prepara su economia pa prome bishita di agencia internacional di calificacion Moody's, den un contexto di crecimiento sostenido y cu obhetivo di logra categoria di inversion, segun e balansa presenta durante prome reunion di aña di Mesa Interinstitucional para el Analisis de la Calificacion del País (Mina-pa).

Actualmente, Guatemala ta mantene un calificacion Ba1 cu perspectiva stabiel, un posicion cu ta refleha estabilidad macroeconomico y debe manchabel, pero cual ainda

ta coloca e pais net bao di nivel necesario pa drenta den e grupo selecto di paisnan cu categoria di inversion, segun informacion di Ministerio di Finanzas Publico di Guatemala.

Durante e reunion, analistanan y funcionarionan a revisa e cifranan economico mas reciente. Pronostico di desempeño macroeconomico pa 2025 ta indica un crecimiento di 4,1%, tendencia cu ta spera pa continua den e lunanan cu ta bin.

Indice di Confianza di Actividad Economico a yega 62,21 punto na februari, un dato cu ta ser considera como indica-

dor di expectativa faborabel den e sector productivo, segun e registro di agencia.

Na mesun momento, inversion publico ya ta representa cerca di 3% di Producto Interno Bruto (GDP), consolidando un tendencia cu a cuminsa na 2023 y cu ta corresponde cu strategia di expansion fiscal adopta door di gobierno.

E proporcion aki ta establece un base positivo pa modernizacion di infraestructura y pa mantene crecimiento economico.

Yegada di analistanan di Moody's lo ta clave pa evalua

calidad crediticio di pais y e cambionan implementa den politica fiscal y gestion publico.

Strategianan y reformanan pa mehora perfil crediticio

Subdirector di Analisis y Politica Fiscal di Ministerio di Finanzas Publico, Alejandro García, a indica cu Guatemala ta implementa un strategia transversal di riesgo pais cu obhetivo di logra categoria di inversion.

E plan aki ta inclui administracion di ingreso y gasto di estado, control di debe publico y fortalecimiento di transparencia.

Den e ruta aki den e mapa, Superintendencia de Administracion Tributaria (SAT) a presenta progreso di su plan strategico 2026-2030, cu ta harmonisa cu proyeccion fiscal di medio plazo.

Ademas, e iniciativa legislativo 6688 ta propone modernizacion di Ley di Contratacion pa agilisa inversion publico.

Mientrastanto, proyecto Smart Public Finance, promovi hunto cu World Bank, ta busca pa optimisa e administracion di sistema financiero di estado.

Jamaica: Bataya nobo di Diaspora rumbo pa corte Mericano pa motibo di eleccion di GJDC

(JamaicaObserver) - No a dura mucho despues cu e Consejo Global di Diaspora di Jamaica (GJDC) a conclui su eleccion pa representantenan cu un resistencia nobo a surgi, menasando di stroba relacionnan entre ciudadanonan di Jamaica na Merca.

E comision electoral di GJDC, cu a conduci e eleccion dia 20 di februari 2026, ta ser acusa di difamacion cu a surgi for di e contenido di publicacion di noticia tocante con un candidato a keda desqualifica for di e proceso electoral.

Atrobe, e situacion ta encera e nomber conoci di abogado Wilfred Rattigan, un agente special di Oficina Federal di Investigacion (FBI) di Merca retira, kende tabata entre e candidatonan cu a busca pa representa GJDC den e parti Noordoost di Merca.

Rattigan a presenta un demanda den e Corte Supremo



di Queens, New York, alegando cu el a ser stroba di participa den e eleccion "pa motibonan falso y invalido cu a ser usa pa desqualifica e demandante inhustamente for di e eleccion di GJDC pa e parti Noordoost di Merca".

"Esaki ta un accion pa daño y perhuicio monetario y alivio equitativo cu ta surgi for di publicacion di declaracionnan falso y difamatorio y implicacionnan difamatorio di e acusadonan cu e deman-

dante ta un criminal condena, ta ser considera como cu e tin caracter cuestionabel, ta ser teni den un balor abou, no tin un bon posicion den comunidad y den bida profesional y ta oponer na coopera cu gobierno y Consejo Global di Diaspora di Jamaica," e demanda ta alega.

Luna pasa, comunidannan Jamaïquino den henter Merca, Canada y Reino Uni a eligi miembronan nobo pa sirbi den e Consejo Global di Di-

aspora di Jamaica y Consejo Global di Hubentud di Diaspora di Jamaica (GJDYC), despues di e conclusion di e eleccion di 2026.

Ministerio di Asuntonan exterior di Jamaica, cu aparentemente ta birando impaciente cu hendenan manera Rattigan y otronan cu frecuentemente ta lastra gobierno, a describi e eleccion como "e competencia mas competitivo y participativo den historia di e consehonan".

E la bisa "un record di 52 candidato y cerca di 1.700 votador aproba" den seis region electoral — Merca Midwest y West; Noordoost di Merca; Merca Sur; Canada; Noord di Reino Uni y Sur di Reino Uni a participa. E resultado ta establece e siguiente organo di liderazgo pa avansa e compromiso estructura entre gobierno di Jamaica y su Diaspora pa e proximo tres aña.

E corant Gleaner y un di su coresponsalnan na Merca

tambe a ser nombra den e accion legal di Rattigan cu tambe ta pretende cu e conducta di e comision electoral di GJDC a caus'e "daño na reputacion, humiliacion y daño economico incluyendo e posicion di e demandante den e Diaspora di Jamaica, pa perhudica e demandante su practica y intervencion den e relacionnan di negoshi prospecto di e demandante".

Contestando na e acusacionnan di Rattigan, presidente di e comision Donovan Wilson a bisa Jamaica Observer cu dos candidato a keda desqualifica for di e competencia, un pa a entrega laat (cu no a ser menciona) y e otro bou di seccion 5.2 di e reglanan cu ta regla e criterionan pa cualkier hende cu ta busca pa representa GJDC.

Rattigan ta sostene cu "mi no ta pas den ningun di e categorian ey y p'esey mi ta buscando daño y perhuicio monetario y alivio equitativo".

Apenas 29% di denuncianan di violencia basa riba genero na Republica Dominicana ta conduci na un orden di proteccion

(DiarioLibre) - A pesar di e cantidad halto di informenan di violencia basa riba genero, violencia domestico y ofensanan sexual na Republica Dominicana, apenas un parti di e casonan aki ta resulta den medidanan di proteccion formal pa victimanan.

Esaki ta keda revela den un rapport di e Observatorio Politico Dominicano y Fundacion Global Democracia y Desaroyo (Funglode), publica den conmemoracion di Dia Internacional di Hende Muhe 2026, cu ta analisa e progreso y buraconan structural pa lora ta trata violencia contra hende muhe den e pais.

E estudio ta indica cu den e ultimo decada (2016-2025), un promedio anual di 73.887 informe di violencia basa riba genero, violencia domestico y ofensanan sexual a keda registra.

Sinembargo, di e total ey, apenas aproximadamente 21.501 orden di proteccion ta ser emiti tur aña. E cifra aki ta representa solamente 29% di e denuncianan.



Segun e rapport, e proporcion aki ta nifica cu apenas tres di cada dies keho ta resulta den un orden di proteccion formal, un mecanismo clave pa preveni violencia.

E datonan usa den e estudio ta procedente di estadisticanan di Oficina di Fiscalia General y ta parti di un analisis mas amplio di e evolucion di violencia basa riba genero na Republica Dominicana.

E analisis historico ta muestra cu entre 2015 y 2017 tabatin un reduccion leve den kehonan, aunke e cifranan a keda riba 65.000 caso anual-

mente, cu un promedio di 15.326 orden di proteccion emiti durante e periodo ey.

Siguientemente, entre 2018 y 2021, a registra un aumento significativo den informenan, alcansando su maximo na 2019.

Den contraste, 2020 a muestra e nivel mas abou, un situacion cu e rapport ta atribui na e contexto di e pandemia di COVID-19 y restriccinnan di movilidad, lora por a conduci na subreportahe di casonan enbes di un reduccion real di violencia. Pa 2021, e cifranan tabata acercando e

nivelnan pre-pandemia.

Den e periodo mas recien, di 2022 pa 2025, e rapport ta indica un reduccion significativa den e cantidad di kehonan, compana pa e nivelnan mas halto den emision di orden di proteccion.

Segun e rapport, violencia basa riba genero ta sigui ta un di e retonan social principal na Republica Dominicana, y for di 2016 pa september 2025, 736 hende muhe a perde nan bida como victima di e fenomeno aki.

Di acuerdo cu e estudio, cu

ta usa estadisticanan di Oficina di Fiscal General (PGR), e cifranan ta muestra variacionnan anual entre 2016 y 2025, cu 2017 cu e cantidad di casonan registra mas halto na 107, mientras cu 2022 a informa e cifra mas abou na 63 feminicidio.

Pa mitar di november 2025, PGR a informa cu 49 caso a ser registra.

E rapport tambe ta detaya cu e districtonan cu e cantidad di mas halto di feminicidio tabata Santo Domingo Este, Distrito Nacinal, y San Cristobal. E lunanan cu mas caso reporta tabata maart y juni, y mayoria di e victimanan tabatin entre 26 y 40 aña di edad.

Pa lora ta trata e armanan cu a ser usa pa comete e delitonan aki, cuchiu y arma di candela tabata entre esunnan mas usa.

E investigacion ta forma parti di un serie di publicacionnan special prepara pa Dia Internacional di Hende Muhe, cu ta examina e progreso realisa y e retonan cu ta keda den reduccion di violencia contra hende muhe den e pais.

Live Nation ta resolve caso anti-competencia cu Departamento di Husticia Mericano

(AFP) – Live Nation a yega na un resolucion tentativo cu Departamento di Husticia Mericano di aluna den e caso federal anti-competencia contra e gigante di entretenimento.

E resolucion, cu ainda ta rekeri e aprobacion di hues Arun Subramanian, ta yega apenas dianan despues cu e huicio anti-competencia a cuminsa na New York.

A inicia e caso bao presidente e tempo ey, Joe Biden, cu fiscalnan acusando Live Nation – cu ta doño di Ticketmaster – un monopolista cu ta controla virtualmente tur entretenimento en bibo na Merca. E resolucion ta rekeri pa Live Nation habri e plataforma di ticket pa competidornan y pa permiti otro promotornan tene evento na cierto lugar



di evento di Live Nation, un oficial senior di Departamento di Husticia a bisa.

Live Nation ta bay desinverti hasta 13 anfiteatro y ta bay paga \$280 milyon den daños na e casi 40 estado cu tabata partido den e demanda anti-competencia contra e compania basa na California, e oficial a bisa.

E aumento di competencia lo mester resulta den un prijs mas abao pa ticket, e oficial a

bisa.

Accionnan di Live Nation a subi casi seis por ciento den bolsa di balor di New York despues di e anuncio.

New York y un cantidad di otro estado a nenga di join e resolucion, y a bisa ayera cu nan litigacion contra Live Nation ta bay continua. “Pa años, Live Nation a haci ganashi enorme door di explota su monopolio ilegal y aumenta costo pa show,” Fiscal

General di New York, Letitia James a bisa. “E resolucion recientemente anuncia cu Departamento Mericano di Husticia no ta atende e monopolio den centro di e caso aki, y lo beneficia Live Nation riba custia di consumidornan,” James a bisa den un declaracion.

“Nos ta bay sigui bringa e caso aki sin gobierno federal pa asina nos por sigura husticia pa tur esanan afecta pa e monopolio di Live Nation.”

Un vocero di fiscal general di New York, un Demócrata, a bisa cu fiscalnan general lo entrega un mocion cu corte pa declara e caso nulo y entrega un caso nobo contra Live Nation presenta solamente pa e estadonan.

E oficial di Departamento di Husticia a bisa cu combersacion cu un cantidad di estado ta andando y tabatin speranza cu algun di nan eventualmente lo acepta e resolucion.

‘Traiciona’

Live Nation ta un gigante den su industria: Na 2025 a organisa mas 55 mil evento rond mundo, atrayendo 159 milyon persona.

Mas aleu cu promocion, e tin accion den 460 lugar di evento, y desde 2010 ta controla Ticketmaster, e bendedor lider di ticket rond mundo.

Departamento di Husticia a acusa Live Nation di abusa di su posicion dominante pa presiona artista y lugar di evento pa firma contract cune, sofoca competencia y impone tarifa excesivo riba fanatico.

E decision di administracion di Trump pa bay dilanti cu e caso contra Live Nation a sorprende hopi observador, cu a interpreta e retiro recien di hefe di competencia di Departamento di Husticia, Gail Slater como un señal cu lo stop e caso.

MARE A HIMNO & BANDERA
18 March 2026 | 11AM - 3PM
15% Local Discount

JOIA
BY IBEROSTAR

\$69 All you can eat Brunch
Reservations through Opentable.com

Muhe deteni tocante tiramento na mansion di cantante Rihanna na Los Angeles



(AFP) – Un muhe, acusa di a tira cu un rifle di atake na e cas di luho di cantante Rihanna na Los Angeles – mientras e super strea di pop tabata den e cas – a keda deteni pa polis ayera.

Agentenan den e ciudad a bisa cu tabatin tiramento den direccion di e mansion den pleno luz di dia diadomingo, door di un sospechoso cu tabata core un Tesla color blanco, cu a para riba caminda.

Imagen di video aereo despues di e atake tabata muestra buraco di bala na e heki di e propiedad enorme, cual Ri-

hanna ta comparti cu rapper A\$AP Rocky y nan tres yiu.

Departamento di Polis di Los Angeles a bisa cu Ivanna Lisette Ortiz a keda aresta na un compleho di tienda mey ora despues di e incidente. Capitan Mike Bland a bisa reporteronan cu e arma usa tabata un rifle estilo AR-15.

A procesa Ortiz pa sospecho di intento di asesinato, cu un fianza poni na \$10.225 milyon.

Rihanna, un di e streanan di pop mas popular na mundo, no a duna comentario publicamente tocante e tiramento.

SpongeBob, Iron Man y Call of Duty: Den e guerra di meme contra Iran



(Reuters) – E video di Cas Blanco ta cuminsa cu un escena di “Call of Duty,” e wega di first-person shooter yen di accion. Despues rapidamente ta pasa pa imagen di fighter jet despegando for di un carrier di avion, misil pasando den shelo y obhe-
vionan explotando den slow motion – tur poni na e ritmo di cantica di rapper Childish Gambino, “Bonfire,” y e voz profundo di un narrador declarando “Nos ta ganando e bataya aki.”

E conteo di morto di Call of Duty, cu ta muestra e bator numerico gana door di elimina enemigo, ta aparece despues di cada explosion. Mira mas di 50 miyon biaha, e video ta parti di un campaña di rednan social cu administracion di Trump a lansa pa bende su campaña di bombardeo contra Iran na e publico Mericano. E video ta compaña pa e frase: “Cortesía di e cora, blanco y blauw.”

E grafiek y sesionnan di informacion sobrio cu a defini conflictonan anterior a keda reemplasa en gran parti pa un campaña di PR diseña cu un vibe di videogame must-rando e poder tecnologico y letalidad di ehército Mericano, cu avion furtivo kibrando door di nubia y obhetivonan explotando den estilo Hollywood mientras bala di candela ta yena e pantaya, cu musica.

Mientras administracionnan

anterior hopi biaha a usa campananan di PR na comienso di un conflicto pa splica pakico Merca a bay guerra, e biaha aki ta tocante con Merca a bay guerra – cu un aire di bravado emblematico di e pais.

Publica pa Cas Blanco y Pentagono riba X, TikTok y Instagram y yen di referencia di cultura pop, musica pulsante y clip di pelicula di accion muscular, e videonan a ser mira miyones di biaha y comparti riba rednan social pa cuentanan pro-Trump.

“Prome tabata tuma tempo y hopi conocimiento,” segun Craig Silverman, investigador y co-fundador di Indicator, un newsletter y website dedica na expone decepcion digital. “Yawo un manager di rednan social na Cas Blanco por hunga cu un di e hermentnan aki pa mey ora y bin cu algo cu ta muestra basta bon.”

Criticonan a describi e serie di video – otro ta muestra Superman, imagen di peliculan “Braveheart”, “Top Gun”, “Iron Man” y “Gladiator” entrecrusa cu e destruccion di hardware militar – un “gamification” (haci manera wega) di un guerra den cual miembro di servicio Mericano y civil Irani a perde nan bida.

Mientras Cas Blanco ta haya dificil pa articula un argumento cla pa e guerra cu a cuminsa cu un campaña di bombardeo Mericano-Israeli



dia 28 di februari, cu presidente Donald Trump y algun miembro di gabinete dunando motivacionnan cambiante y contradictorio, algun ex-oficial Republicano y experto di comunicacion ta describi e videonan como intentonan mahos, fanfarron pa purba di muestra supremacia militar Mericano.

Na su lugar, nan ta bisa, Trump lo mester ta splicando claramente na Iraninan y publico Mericano pakico Merca a impulsa otro conflicto den Medio Oriente.

Asina mes, administracion di Trump a proba altamente efectivo den comunica riba rednan social – hasta oa e tono ta representa un retiro marca for di normanan presidencial, expertonan a bisa. Esey ta particularmente berdad ora ta trata di yega na sostenedornan di Trump.

Matthew Baum, profesor di comunicacion global na Harvard University John F. Kennedy School of Government a bisa cu e problema potencial pa Trump ta cu el a

campana riba un promesa di isolacionismo Mericano.

Como resultado, no ta cla cu e mensahe di dominio militar mediante meme y video online ta bay ta mesun efectivo cu e uso anterior di Trump di rednan social pa yega na su sostenedornan MAGA.

“E problema aki ta cu su base no ta exactamente di acuerdo cu e guerra na Iran. Pues ta un audiencia dificil mientras usualmente ta e caso cu e base MAGA ta cla pa sigui unda cu e lidera nan.”



National Anthem and Flag Day Breakfast

25% off for locals*

laguna

MARCH 18TH | 7 AM – 12 PM

For reservations +297-526-6612 or Scan QR code

Hilton
ARUBA CARIBBEAN RESORT & CASINO

*Offer is valid for local residents with a local ID. Limited to a maximum of 30 persons. Bottles are not included in this offer.

Australia ta duna asilo na futbolista Irani

(AFP) – Australia a otorga asilo na algun di e team di futbol femenino di Iran cu tabata di bishita, tocante miedo cu nan ta enfrente persecucion na cas pa no canta e himno nacional prome cu un partido, minister di Interior, Tony Burke a bisa diamars.

E gesto di e hungadornan Irani prome cu un partido di torneo Cup Asiatico na Australia siman pasa a ser mira ampliamente como un acto di desafio contra e republica Islamico.

Cinco hungador a huy di e hotel di e team den Gold Coast di Australia durante anochi, scondi den un “sitio safe” mientras a presenta nan solicitud di asilo, Burke a bisa.

“Polis di Australia a traslada nan na un sitio safe. Mi a aproba ayera nochi nan aplicacion pa visa humanitario,” el a bisa reporteronan. “Nan ta bon bini pa keda na Australia, y nan ta safe akinan, y mester sinti na cas aki.”

Presidente Mericano, Donald Trump anteriormente a bisa cu el a papia cu prome minister Australiano, Anthony Albanese pa confirma cu e muhenan tabata safe. “Mi a caba di papia cu prome minister Anthony Albanese di

Australia, tocante e team nacional Irani. E ta riba dje! Ya a atende cinco di nan,” Trump a bisa dialuna riba su plataforma Truth Social, menos di dos ora despues di un post inicial urgiendo Australia pa tuma nan.

Trump a agrega cu “algun di nan, sinembargo, ta sinti cu nan mester bay back pasobra nan ta preocupa tocante e seguridad di nan famia, incluyendo menasa na e miembronan di famia ey si nan no bolbe.”

Canal Australiano, ABC a reporta cu cinco hungador a evadi e ‘handler’nan di e team na nan acomodacion den Gold Coast.

Contestando tocante nan caso diadomingo, minister di Exterior, Penny Wong a bisa cu Australia “ta para den solidaridad” cu pueblo di Iran.

Yiu di e shah fayecido di Iran, Reza Pahlavi basa na Merca, a adverti dialuna cu e rechazo pa canta e himno nacional por tin “consecuencia severo”, y a urgi Australia pa ofrece proteccion pa e team. Pahlavi, kende no a bolbe Iran desde prome cu e Revolucion Islamico di 1979 cu a saca e monarkia, a presenta su mes como e persona pa lidera un transicion democratico



pa un Iran secular mientras e regimen teocratico ta lucha pa sobrevivi.

Politico, activista di derecho humano y hasta autor di “Harry Potter,” J.K. Rowling a haci un yamado pa ofrece e team di futbol proteccion oficial. “Por favor protege e muhenan jong aki,” Rowling a bisa den un post riba rednan social.

‘Salba nos muchanan’

Un presentador riba television estatal Irani a tilda e futbolistanan di “traidornan di guerra” despues cu nan a para sin move durante e himno prome cu nan partido contra Corea di Sur. Den weganan

subsecuente, e hungadornan a saluda y canta.

Multitudnan a reuni pago di e stadion na Gold Coast unda e hungadornan a hunga nan ultimo partido durante weekend, batiendo tambu y gritando “cambio di regimen pa Iran.”

Despues nan a rondona e bus di e team Irani, gritando “laga nan bay” y “salba nos muchanan.”

Dialuna, un periodista di AFP a mira miembronan di e team ta papia riba telefon for di balcon di nan camber di hotel.

Contestando tocante e po-

sibilidad di asilo, un vocero pa departamento di Interior Australiano a bisa AFP anteriormente cu e “no por comenta riba circunstancianan di individuo.”

Campañador di Amnesty International, Zaki Haidari a bisa cu e muhenan ta enfrente persecucion, of pio, si manda nan cas. “Algun di e miembronan aki di e team ya a haya menasa contra nan famia,” Haidari a bisa AFP. “Nan bayendo back... ken sa ki sorto di castigo nan lo ricibi?”

Embahada di Iran na Australia no a responde na un solicitud pa comentario.

Djokovic ta sobrevivi susto pa alcanza ultimo 16 na Indian Wells

(AFP) – Novak Djokovic a logra un victoria dificil 6-4, 1-6, 6-4 contra e Mericano rango No. 72, Aleksandar Kovacevic dialuna pa alcanza e di cuatro ronda na Indian Wells pa prome biaha desde 2017.

Djokovic, hungado su prome torneo desde cu el a cay contra Carlos Alcaraz den final di Australian Open, a haya tur loke e por a soporta for di Kovacevic, 27, kende a tira e superstrea Serbia cu 16 ace.

“Mi tabata sa drelando e partido cu si e serve bon y si e scoge su posicion den e box e lo ta dificil pa break e,” segun Djokovic, kende a break Kovacevic den e wega final pa bay cu e victoria. “Esey ta loke a pasa realmente. E tabata serve extremadamente bon (excepto) talbes un wega den e prome y talbes e ultimo wega di e di tres set – el a bira un tiki preta, a faya algun prome serve. El a pone mi den un posicion unda mi por



a gana y mi a probecha.”

Cu cinco titulo di Indian Wells, Djokovic ta empata pa e record cu gigante Suizo, Roger Federer.

Pero e super strea Serbia no a alcanza e quart final den desierto di California desde su

ultimo campaña pa e titulo na 2016, y awo e mester a pasa door di un par di tres-set pa bolbe na e ultimo 16.

Djokovic a tuma control cu un break trempa den e set di apertura y a pon’e wanta.

Pero Kovacevic claramente

tabata garando forma. El a wanta la love den su ultimo dos service games di e set di apertura y a lora den e di dos contra un Djokovic claramente frustra.

Djokovic a regroupa den e di tres set, y a pesar di un caida

den e di ocho game, a haya un manera pa gana.

“Esey ta loke ta conta na final, haya e ‘W,’” segun Djokovic, kende ta bay enfrente proximo e campeón defensor Jack Draper of Francisco Cerundolo pa un posicion den e quart final.

Alcaraz, den pleno racha invicto 13-0 mientras e ta busca su di tres titulo Indian Wells, ta enfrente Arthur Rinderknech di Francia bao di luznan di Stadium Court. E triunfo den Australian Open di e Spaño di 22 aña di edad a hacie e homber mas jong pa completa un Grand Slam den su caerea, y el a sigui cu un titulo na Doha na februari.

Awo, Alcaraz tin meta pa bolbe e circulo di ganador na Indian Wells, unda su intento pa un di tres titulo consecutivo aña pasa a keda destrui pa Draper den semi-final.

Coach di Irak ta pidi pa cambia fecha di playoff di Mundial

(AFP) – Coach di Irak, Graham Arnold a suplica FIFA ayera pa pospone e playoff intercontinental di su team pa Mundial pasobra hopi di su hungadornan y personal tecnico ta atrapa pa e guerra creciendo na Iran.

E Irakinan ta programa pa enfrenta sea Surinam of Bolivia dia 31 di maart na e ciudad Mexicano di Monterrey pa un lugar den final di Mundial, pero cu espacio aereo Iraki cera te dia 1 di april, e team di Arnold no por reuni ni biaha.

“Si e wega bay door na Mexico nos ta bay tin dificultad pa sali for di Baghdad,” segun Arnold, un Australiano, a bisa CNN. “Como 60 por ciento di mi hungadornan ta hunga na Irak, tur personal back-room ta biba na Irak, tur mi personal medico ta biba na Qatar, y nos tin problema pa haya visa Mexicano na e momento aki,” el a agrega.

Arnold a bisa cu ya el a haya



su mes forsa pa cancela un training camp na Merca. “Tur esey a keda cancela awo pasobra nos no pro sali di Baghdad,” el a bisa.

“FIFA mester haci obviamente un decision rapido riba esaki pasobra ta un tiki

inhusto na e momento aki, cu loke nos mester pasa door di dje.”

El a sugeri pa Surinam y Bolivia bay door cu nan playoff na Monterrey dia 26 di maart y e ganador di e wega ey por enfrenta Irak na Merca net

prome cu Mundial, cu ta cuminsa dia 11 di juni.

“Surnam lo por semper hunga contra Bolivia si nos no por yega, y nos semper por hunga contra e ganador net prome cu Mundial y (esey) ta laga nos prepara adecuada-

mente y haci tur loke ta rekeri pa ta exitoso,” Arnould a bisa. “Bolivia y Surinam por hunga na maart, nan no tin complicacion cu vuelo ni nada, nan por yega eynan di biaha y nos por hunga contra e ganador. E ganador ta keda y ta hunga den Mundial y e perdedor ta bay cas.”

Arnold a bisa cu autoridadnan di futbol Iraki tabata den contacto cercano cu FIFA, pero el a admiti cu e situacion tin su peso. “Ta un stap cada biaha, e ta duna stress (mi tin) hopi anochi sin drumi preocupando tocante haci e planificacion drechi,” el a bisa.

Un fuente Iraki a bisa AFP cu e federacion nacional a pidi pa e cambio. “E solicitud di Irak a yega pa motibo di e inhabilidad di e delegacion pa biaha for di e capital Baghdad,” nan a bisa. “Como resultado di e cierre di espacio aereo y e riesgonan di seguridad afectando e region actualmente,” nan a agrega.

Nuebe aresto despues di bataya entre fanatico di Rangers y Celtic

(AFP) - Polis a haci nueve aresto despues cu fanaticonan di Rangers y Celtic a enfrenta otro riba cancha despues di e quart final di Scottish Cup dia-domingo, den escenan mahos cu por caba cu alocacionnan grandi di ticket pa fanatico bishitante na derby di Old Firm.

Sostenedornan di Celtic a celebra nan victoria den penalty den e quart final na Ibrox door di subi e cancha, generando un invasion di represalia di centenares di fanatico di Rangers.

Polis y personal di seguridad eventualmente a forma un barera entre e fanaticonan rival despues cu a tira obhetu, incluyendo un flambeu cendi. Polis a bisa cu un mucha di 10 aña a ser tira cu un moneda, y un oficial a ricibi golpi cu boter.

Video a mostra un agente femenino ta ser benta abao for di patras pa un fanatico di Rangers cu tabata core den direccion di e tribuna Broomloan, cu tabatin 7.500 sostenedor di Celtic aden.

Un homber di 47 aña di edad a keda deteni pa polis despues di un incidente involucrando un miembro di personal di

coaching di Celtic.

Imagen di celular tambe a mostra un fanatico lansando un scop na defensa di Celtic, Julian Araujo, prome cu otro a core y pusha e internacional Mexicano.

Polis mester a atende incidentenan pafo di e stadion, cu varios agente, personal di seguridad y miembronan di publico herida den e escenan caotico.

A haci nueve aresto den 24 ora, cu “significamente” mas spera, generando yamado pa reduci e alocacionnan pa bishitante ora e rivalnan di Glasgow topa otro.

A permiti pa Celtic tin 7.500 fanatico den Ibrox pa prome biaha desde 2018.

Alocacionnan recien pa bishitante a varia di alrededor di 750 na ausencia completo, na alrededor di 2.500, pero reglanan di Scottish Cup ta indica cu clubnan bishitante por reclama hasta 20 por ciento di ticket y a yega na un acuerdo despues di input di Asociacion di Futbol Escoces.

Sinembargo, hefe superintendente di Polis di Escocia, Emma Croft ta kere cu e alocacion tabatin un impacto riba e problema. “Tin un ri-



validad andando y agresion reprimi entre e dos banda, absolutamente,” el a bisa. “Y pa mi, tambe, un base di fanatico bishitante asina grandi dentro di Ibrox, cual tabata nobo pa hopi hende y un experiencia nobo pa hopi hende, mirando e tempo, mi ta kere cu esey a hunga su parti, absolutamente.

“Mi no ta kere ta corecto pa mi bisa cu ta un prohibicion completo, pero loke mi si lo bisa ta cu e set-up ey no ta

sostenible y no ta safe.”

Un cantidad di fanatico di Celtic sin ticket a kibra drenta e stadion y graffiti den Broomloan Stand a inclui referencianan na e desaster di Ibrox 1971, den cual 66 fanatico di Rangers a muri den un estampida mientras nan tabata bandona un wega di Old Firm.

Un revision di e operacion di polis a keda lansa, pero Croft ta sinti cu tabatin suficiente

agente desplega y cu nan a reacciona “lo mas lihe y apropiadamente cu nos tabata por.”

“Nos ta tratando cu un menasa y riesgo den hopi area di e stadion, paden y pafo. E publico ta mira un area y ta eynan unda e camaranan ta punta,” el a bisa.


“Ta hopi dificil pa responde riba e cancha di wega ora bo tin un cantidad di otro hende cu intencion di purba topa otro pa causa violencia.”

Anthropic ta demanda administracion di Trump pa disputa cu Pentagono

(AFP) - Compania di inteligencia artificial Anthropic a presenta un demanda dialuna contra e administracion di Donald Trump, alegando cu gobierno federal a tuma represalia contra e compania despues cu el a nega permiti cu su modelo di AI Claude ser usa pa guerra mortal autonomo y pa vigilancia masivo di ciudadano Mericano.

Den un demanda di 48 pagina, presenta na corte federal na San Francisco, Anthropic ta pidi pa e designacion cu ta clasifica e compania como un riesgo di cadena di suministro pa seguridad nacional ser declara ilegal y blokia.

Den su demanda, Anthropic a indica cu e compania a ser funda riba creencia cu su tecnologia di inteligencia artificial mester ser usa “den un manera cu ta maximisa resultado positivo pa humanidad” y cu e mester ta “e sistema



mas seguro y mas responsable posible.”

“Anthropic ta presenta e demanda aki pasobra gobierno federal a tuma represalia contra nos pa expresion di e principio aki,” segun e texto di demanda.

Anthropic ta e prome compania Mericano cu a ricibi publicamente un designacion di e tipo aki, un etiket cu normalmente ta ser reserva pa or-

ganisacionnan for di paisnan adversario, manera e gigante tecnologico Chines Huawei.

E designacion ta exige cu contratistanan militar y proveedoran di defensa certifica cu nan no ta usa modelonan di Anthropic den nan trabao cu Pentagono.

“Consecuencianan di e caso aki ta enorme,” segun e demanda, añadiendo cu gobierno ta purbando di “destrui e valor economico crea pa un

di e companianan priva cu ta creciendo mas lihe na mundo.”

Origen di e conflicto

E disputa a surgi despues cu Anthropic a provoca molestia di secretario di Defensa Pete Hegseth, despues cu e compania a insisti cu su tecnologia no mester ser usa pa vigilancia masivo ni pa sistema di arma autonomo completamente.

Presidente Trump posteriormente a duna orden tur agencia federal pa stop di usa tecnologia di Anthropic. Algun ora despues, Hegseth a declara Anthropic como un “riesgo di cadena di suministro pa seguridad nacional” y a duna orden cu ningun contratista, proveedor of socio militar por realiza actividad comercial cu Anthropic, aunke Pentagono mes lo tin un periodo di transicion di seis luna.

E conflicto a escala apenas algun dia prome cu e atake militar di Merca contra Iran.

Modelo Claude ta actualmente e modelo di AI mas amplia usa pa Pentagono y e unico modelo di frontera cu ta opera den e sistema clasifica di Departamento di Guerra.

Argumentonan legal

Den su demanda, Anthropic ta argumenta cu accionnan tuma contra e compania ta viola e First Amendment, pasobra gobierno a castiga e compania pa su posicion publico riba seguridad di AI.

“E Constitucion no ta permiti gobierno usa su enorme poder pa castiga un compania pa su expresion proteha,” segun e texto di demanda.

Anthropic ta pidi corte pa emiti un orden permanente cu lo blokia aplicacion di e designacion.

Imagen satelital falso genera cu AI ta alimenta desinformacion den guerra entre Merca y Iran

(AFP) - Un imagen satelital publica via un medio di noticia Irani tabata muestra algo cu parece real: un base militar di Merca na Qatar completamente destrui. Pero e imagen tabata un falsificacion genera cu inteligencia artificial, resaltando e menasa creciente di desinformacion digital durante guerra.

E crecimiento di AI generativo a acelera e capacidad di actornan estatal y propagandistanan pa crea imagennan satelital convincente durante conflictonan grandi, un tendencia cu investigadornan ta adverti tin implicacion real pa seguridad.

Mientras e guerra entre Merca y Israel contra Iran ta continua, corant alinea cu estado Irani Tehran Times a publica riba red social X un imagen cu el a bisa tabata muestra un comparacion “prome y despues” di ekipahe radar Mericano completamente destrui na un base militar na Qatar.

En realidad, investigadornan a confirma cu e imagen tabata un version manipula cu AI di un foto di Google Earth



for di aña pasa cu ta muestra un base militar Mericano na Bahrain.

Entre e señal visual sutil cu a revela manipulacion tabata un fila di auto staciona exactamente den mesun posicion den e foto original y den e version falsifica.

Asina mes, e imagen manipula a yega miyones di bista mientras el a circula riba rednan social den varios idioma, ilustrando con usuarianan cada bes mas ta haya dificultad pa distingui realidad di ficcion den plataformanan satura cu contenido genera cu AI.

Investigador di inteligencia open source Brady Africk a nota un aumento den imagen satelital manipula cu ta aparece riba rednan social despues di eventonan importante, incluyendo e guerra den Medio Oriente.

“Hopi di e imagennan manipula tin señal tipico di generacion imperfecto cu AI: angulonnan raro, detaye cu no ta cla y caracteristicanan inventa cu no ta coresponde cu realidad,” Africk a bisa.

“E otronan parece mas manipula manualmente, por ehempel superpone señal di daño

of otro cambio riba un imagen satelital cu originalmente no tabatin e detayenan,” el a agrega.

“Consciencia critico”

“Imagen satelital manipula, manera otro forma di desinformacion, por tin impacto real si hende actua riba informacion sin verifica su autenticidad,” Africk a bisa.

Segun e, e impacto por varia for di influencia riba opinion publico tocante decisionnan politico — manera si un pais mester participa den guerra — te incluso efecto riba mercado financiero.

Den un era di inteligencia artificial, imagen satelital autentico di resolucion halto recoge den tempo real por duna legisladornan un pista vital pa evalua menasa di seguridad y desmenti informacion falso.

Durante un atake reciente contra aeropuerto di Niamey na Niger, compania di inteligencia satelital Vantor a detecta imagennan cu ta circula online cu parece di muestra e terminal civil principal na candela.

Imagen satelital propio di compania a confirma cu e potretnan tabata falso y probablemente genera cu AI, segun representante Tomi Maxted.

Profesor Bo Zhao a splica cu ora un imagen satelital ta presenta como evidencia visual durante guerra, e por facilmente influencia e manera cu publico interpreta eventonan. Mientras imagennan genera cu AI ta bira cada biaha mas convincente, Zhao a enfatisa cu ta importante pa publico aborda e tipo di contenido visual cu cautela y consciencia critico.

4 persona herida ora nan UTV a bolter riba caminda



Diasabra atardi a drenta informe di un accidente cu hende herida riba e caminda biniendo back for di Kapel Alto Vista, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente unda cuatro turista riba un UTV cu a bolter biniendo back for di e Kapel. Tur cuatro a resulta cu rascanan y un so a keda herida y a ser hiba cu ambulance pa hospital. E otro nan a ser atendi pa nan rascanan y golpi di menos importancia y a bay den e auto di compania. Polis a tuma e investigacion over mientras e compania unda nan a huur e UTV a bin pa busca e UTV kibra.

Atrobe turista ta accidenta cu un electric bike na Schotlandstraat



Diabierna mainta a drenta informe di un accidente cu hende herida na Schotlandstraat, mesora a dirigi un ambulance na e sitio.

Na yegada di e ambulance nan a atende e victima cu a fractura su enkel y a transport'e pa hospital.

Hincamento despues di pelea cu arma na Tanki Leendert




Diasabra madruga a drenta informe di cu tin un pelea cu arma na un club nocturno na Tanki Leendert, mesora a dirigi tanto polis como ambulance na e sitio.

Na yegada di e patruya a bin compronde cu e bringador nan lo ta banda di JZ Wheels. Na yegada di e ambulance a bin compronde cu e persona hinca cu un boter lo a bay caba cu auto particular pa hospital



mientras e sospechoso lo a ser deteni patras di Digicel na Tanki Leendert. Na e auto a bin haya un machete y un holoshi polis a confisca esakinan pa e investigacion.

Polis y ambulance a bay pa persona di edad cu a haya un hematoma!



Diasabra mainta a drenta informe di cu un homber a cay abao dal su cabes na Saliña Cerca, mesora a di-

rigi tanto polis como ambulance na e sitio.

Na yegada di e patruya a bin

compronde cu e persona lo a dal abao y su cabes a dal na e vloer. Na yegada di e ambulance a nota



cu e caida y dal e cabes a pone cu e persona a haya un bolo-bonchi na su cabes, mirando e edad a bisa cu ta mihor pa

e bay haci un control mas extenso na hospital.

Motociclistanan a bolbe cuminsa cu desordo dilanti ex-Strand Hotel

Despues di un temporada cu e asunto di aglomeracion di brommernan dilanti Linear Park cu refimento di brommer y musica a calma un poco diasabra anochi pa dia-domingo madruga por a observa e desordo a bolbe lanta cabes.

Turistanan hospedando na e hotel tabata kehando di e bochincha cu esakinan tabata haci y atrobe polis mester a bay pa para e cos aki. Por mira hasta e manchanan cu e tirenan ta laga atras.



Polis ta deteniendo chauffeurnan bao influencia



Diasabra anochi polisnan a bay staciona nan mes na puntonan strategico den area di Santa Cruz y vecindario cu e intencion pa tene un control den trafico.

Nan a para autonan cu tabata falta luz, chauffeur cu tabata core zig zag, chauffeur cu celular den man etc. Ademá a control pa papelnan na ordo y si chauffeurnan tabata core bao influencia. Esnan bao influencia a ser deteni y hiba warda di polis.



Inscripcion habri pa Copa Hubenil Gobernador Felipe B. Tromp 2026

Inscripcion ta habri pa entrega nominacionnan pa Copa Hubenil Gobernador Felipe B. Tromp pa aña 2026. Ultimo dia pa entrega un nominacion lo ta diaranson 8 di april 2026 na Asociacion Trabou di Hubentud na Aruba (ATHA).

Na aña 1992, e Copa Hubenil a wordo estableci oficialmente. Esaki a tuma lugar despues cu señor Felipe B. Tromp, kende a sirbi como prome Gobernador di Aruba, a pasa e responsabilidad pa su sucesor, mr. Olindo Koolman.

Felipe B. Tromp a nace na Aruba riba 15 di october 1917 y a fayece riba 12 di augustus 1995. Durante su bida, el a distingui su mes como un figura importante den e desaroyo social y cultural di nos isla. El a tuma parti activamente den varios iniciativa y organisacion cultural, entre



nan Fundacion Centro Cultural Aruba. E fundacion menciona tabata encarga cu e promocion y desaroyo cultural na Aruba, y pa hopi aña el a haya respaldo financiero for di Sticusa, un fondo Hulandes cu a brinda apoyo durante e periodo di 1948 te 1991. For di 1984, e recurso financiero a ta wordo

dirigi directamente na Aruba. Ademá di su trabou den e campo cultural, Tromp a ocupa varios posicion den servicio publico. El a desempeña su mes como politico, ministro y inspector di enseñansa. Na 1986, el a marca historia como e prome Gobernador di Aruba.

Kendenan ta bini na remarca pa e Copa Hubenil?

Un hoben of organisacion hubenil cu a destaca durante e ultimo aña sea riba tereno cultural, social of deportivo por wordo nomina. E edad mester ta entre 6 pa 20 aña. Y e periodo di e logronan mester ta di 15 di april 2025 pa 8

di april 2026.

E logronan por ta premionan gana, pero tambe hopi importante loke e hoben of grupo a haci na nan propio formacion manera curso, trabou comunitario, disciplina etc.

Comision ta invita tur instancia cultural, social y deportivo pa repasa e actividadnan realisa pa nos hobennan durante e periodo menciona y pa manda e nominacionnan prome cu 8 di april proximo.

E ganado(nan) lo ricibi e premio for di man di Su Excelencia Gobernador di Aruba dia 27 di april, dia di Rey.

Por entrega e nominacionnan via e link comunica ariba ATHA su pagina di Facebook: ASOCIACION TRABOU DI HUBENTUD NA ARUBA – ATHA, personalmente na ATHA situa na Caya Appeldam # 2 of via email info@athaaruba.com

Merca ta designa grupo Muslim Brotherhood como ‘terrorista’

(AFP)—Merca a bisa dialuna cu e lo designa Muslim Brotherhood na Sudan como un organisacion terrorista y a acusa e grupo Islamista di ricibi sosten di Iran.

E dsignacion, cual lo ta efectivo den un siman, ta bin despues cu Merca a declara na januari varios otro sector di Muslim Brotherhood como organisacionnan terrorista, incluyendo den e base historico di Egipto.

“E grupo Sudanes Muslim Brotherhood ta usa violencia contra civilnan pa mina esfuersonan pa resolve conflicto na Sudan y avansa su ideologia Islamista violento,” e Departamento di Estado a bisa den un declaracion.



E Muslim Brotherhood “a contribui mas cu 20.000 combatidor na e guerra na Sudan, hopi di nan ricibiendo entrenamiento y otro sosten for di e Guardia Revolucionario Islamista di Iran, e sector ideologico elite di Te-

heran su ehercito, e departamento a bisa.

E departamento a acusa Muslim Brotherhood di a “conduci ehecucionnan masal di civilnan den areanan cu nan a captura.”

Iran, goberna pa clerigonan Shiite, y Muslim Brotherhood, un organisacion Sunni cu historicamente tabatin rednan extensivo dentro di Egipto, ambos a duna sosten na e ehercito Sudanes.

E ehercito tabata involvi den un guerra civil pa casi tres aña contra e grupo paramilitar Rapid Support Force (RSF), unda combatimento a tuma bida di dies miles hende, desplazando mas cu 11 miyon y a hinca areanan den condicionnan parecido hamber.

Investigacionnan di e Organizacion di Nacionnan Uni (UN) a bisa aña pasa cu RSF

a comete actonan di genocidio cu asenatonan sistematico y violencia sexual contra Sudanesisnan. Merca tambe a bisa cu e ehercito a comete crimennan di guerra.

E gobernador militar Egipcio cu a bira presidente, Abdel Fattah al-Sisi, a aborda fuertemente riba Muslim Brotherhood na cas. Enfocando riba Muslim Brotherhood tambe tabata un yamado na Washington pa algun Republicanonan conservativo, parcialmente pa via di teorlanan di conspiracion cu e grupo ta purbando di impone ley sharia Islamico na Merca.

Reino Uni ta acusa
homber cu crimen
contra humanidad den
manifestacionnan na Siria

(AFP)—Fiscalnan Britanico a acusa un residente Britanico cu crimen contra humanidad supuestamente cometi na Siria, conecta cu su rol den stroba manifestacionnan na april 2011, polis a bisa dialuna.

E Counter Terrorism Policing basa na Londres a bisa cu e tabata e “prome persecucion di su tipo na Reino Uni.”

“E hombre di 58 aña, ken awor ta biba na Reino Uni, a ser acusa den relacion cu su tempo trahando den e Syrian Air Force Intelligence (AFI) na Damascus,” CTP a bisa.

E hombre, ken no a ser nombra, ta programa pa aparece na corte magistral di Westminster na Londres diamars. El a ser acusa cu tres conteo di asesina como un crimen contra humanidad, tres conteo di tortura y un conteo di conducta auxiliar pa asesina como un crimen contra humanidad.

“E cargonan aki ta conecta cu demostracionnan cual a tuma luga den suburbionan di Damascus, Sirio, na april 2011,” polis a bisa, agregando cu supuestamente el a lidera un grupo encarga pa stop e manifestacionnan na Jobar.

E guerra civil Sirio a plama na maart 2011 ora manifestacionnan anti-gobierno grandi a estaya den e pais inspira



parcialmente pa e otro protesta Arab Spring.

Ex-presidente Bashar al-Assad a aborda e manifestacionnan aki fuertemente. Assad, di ken su famia a goberna Siria sin piedad pa casi cinco decada, porfin a huy pa Rusia na december 2024 despues cu un ofensivo lidera pa Islamista a arebata un ciudad tras di otro for di su control te ora cu Damascus a cay.

“Esaki tabata un investigacion increíblemente complejo y dificil, envolviendo cuestionamento den varios pais,” hefe di CTP London Helen Flanagan a bisa. “E cargonan ta extremadamente serio y ta muestra cu nos ta sostene completamente e politica Britanico di “ningun lugar safe” pa criminalnan di guerra.”

Resultado Sorteo 9 maart 2026			
Cadena Alexander Lottery ta presenta resultado di weganan di suerte			
DIARIO	KORSOU	SUPER4	FLAMINGO
1078	7315	5792	7073
9532	8833	SUPER5	9805
7669	4059	-	1123

MERDIA	ANOCHI														
 Sorteo # 4913 8612 2725 2907  FP  Sorteo # 4913 7078  FP  Sorteo # 2969 9285  Sorteo # 4913 7089 Tauro  Sorteo # 1787 409  FP	 Sorteo # 8795 5221 5291 3706  X2  Sorteo # 7839 8629  FP  Sorteo # 2544 6031  Sorteo # 6598 7338 Piscis  Sorteo # 1528 412  X2	 Sorteo # 0 x Jackpot 0 x Match 4+ 0 x Match 4 0 x Afl. 12,00  Sorteo # 7119 0 x Jackpot 15 x Match 4 238 x Afl 8,00	<table><tr><td>Joker</td><td>Letter</td></tr><tr><td colspan="2">Proximo Jackpot</td></tr><tr><td colspan="2">240.000,-</td></tr></table> <table><tr><td colspan="2">04-15-16-28-29</td></tr><tr><td colspan="2">Proximo Jackpot</td></tr><tr><td colspan="2">103.000,-</td></tr></table>	Joker	Letter	Proximo Jackpot		240.000,-		04-15-16-28-29		Proximo Jackpot		103.000,-	
Joker	Letter														
Proximo Jackpot															
240.000,-															
04-15-16-28-29															
Proximo Jackpot															
103.000,-															
 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00	<table><tr><td>Mega Ball</td></tr><tr><td>Proximo Jackpot</td></tr><tr><td>300.000,-</td></tr></table>  Afl. 420.000,-	Mega Ball	Proximo Jackpot	300.000,-											
Mega Ball															
Proximo Jackpot															
300.000,-															
 Sorteo #	<table><tr><td>Sorteo #</td></tr><tr><td></td></tr></table>	Sorteo #													
Sorteo #															
															



Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**

Irenestraat 21 Aruba
297-588-1179

**Fundacion Pa Nos
Muchanan**

Cumana 2 Aruba
297-583-4247

**Fundacion Tel Pa
Hubentud**

Wilhelminastraat 19
Aruba
297-588-6138

**Koningin Wilhelmina
Fonds**

Spinozastraat 9 Aruba
297-582-0412

Mary Joan Foundation

Sabana Blanco 8 Aruba

297-588-9999

Rode Kruis Aruba

Pedro Gallegostraat 14
Tel.297-582-2219

Fax 588-3376

Famia Planea (SBVO)

Avenida Milio J Croes 17

B Aruba

297-588-9591

www.famiaplanea.org

famiaplanea@hotmail.com

**Stichting Fundacion
Guia Mi**

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081



Dokter na warda

Oranjestad San Nicolas
Hospital Imsan
7:00 pm / 10:00 pm **24 ora**

Botica na warda

Oranjestad: San Nicolas:
Dakota : Centro Medico:
Tel. 588 7364 Tel. 584 5794

EMERGENCIA 911

POLIS

Oranjestad	100
San Nicolas	104
Santa Cruz	105
Noord	107
Tip Line	11141
Brandweer	115
Ambulance	911
Hospital	527-4000
Imsan	524-8833
Warda Costa	913
Seguridad Nacional	11911
Cruz Cora	582-2219

BOTICA

Aloe	584-4606
4 Centro Medico	584-5794
Central	585-1965
Dakota	588-7364
Del Pueblo	582-1253
Eagle	587-9011
Kibrahacha	583-4908
Maria	585-8145
Di Servicio Noord	586-4606
Oduber	582-1780
Paradera	588-6638
San Lucas	584-5119
Santa Anna	586-8181
Santa Cruz	585-8028
Sero Preto	584-4833
Trupial	583-8560

UTILIDAD

Setar	117
Web	525-4600
Elmar	523-7147

FUNERARIA

Aurora	588-6699
Royal Funeral H.	586-4444
Ad Patres	584-2299
Olive Tree	584-8888

**Aruba Transfer Tour &
Taxi C.A.**
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Cabesante di canal Austriaco ta retira despues di acusacion di acoso sexual

AFP) – Canal publico Austriaco, ORF a anuncia di aluna cu su director ta retirando for di su posicion despues di acusacionnan di acoso sexual di un empleado femenino.

E retiro di Roland Weissmann ta yega dos luna prome cu e canal Austriaco ta anfitrión di e Eurovision Song Contest e aña aki, cu ta bay tuma lugar na Vienna na mei.

Weissmann, 57, ta retirando di su posicion “cu efecto inmediato,” hunta di e canal a anuncia den un comunicado di prensa ayera.

Den dianan recien, un empleado di ORF a haci acusacion di mal conducta sexual contra Weissmann, kende ta rechasa tur acusacion, a agrega.

E acusacionnan contra e director general “ta rekeri investigacion rapido y transparente,” e declaracion di ORF ta bisa.

Abogado di Weissmann, Oliver Scherbaum a anuncia accion legal contra e acusacionnan cu el a bisa “no a keda clarifica di ningun manera.” “Te e fecha, no a provee mi cliente cu e hechonan exacto di e caso manera presenta pa e empleado. Asina mes, pa por



evita daño na e compania, el... a renuncia di su posicion... diadomingo,” Scherbaum a bisa den un comunicado di prensa.

“E cobertura mediatico di e acusacionnan aki... ta representa un reaccion completamente inapropia y excesivo,” el a bisa, agregando cu e

movida ta yega apenas lunas “prome cu e proximo eleccion di director general di ORF.”

Eurovision Song Contest 2026 ta tuma lugar di dia 12 te 16 di mei na Vienna, despues cu artista Austriaco, Johannes Pietsch a gana e edicion di aña pasa na Basel, Suiza.

Pronostico di tempo

Tempo:

Awe tardi y awe nochi: parcialmente nubla y generalmente seco

Den marduga y mañan: parcialmente nubla cu un awa-sero pasahero

Temperatura maximo 32 grado celsius

Temperatura minimo 26 grado celsius

Indice di calor (heat index) den y rond di oranan di merdia: 33 pa 37 grado celsius
UV index: 12

Bahada di solo : 6:49 pm
Subida di solo : 6:55 am

Biento:

Moderata te basta fuerte for di direccionnan generalmente oost;

Forsa 4 te 5 (20 te 39 km/ora, 11 te 21 nudo).

Durante di dia fuerte te duro den rafaga;

Forsa 6 te 7 (40 te 61 km/ora, 22 te 33 nudo)

Situacion general di tempo pa proximo 24 ora:

E area vigoroso di presion halto riba Atlantico lo produci un biento fuerte te duro den rafaga.

Humedad modera den e partinan mas abou di atmosfera y transporta cu e biento pa region

local, lo por duna algun awa-sero hopi breve. Esaki principalmente den oranan di marduga y mainta. Sinembargo, no ta spera yobida di importancia.

Condicionnan maritimo/estado di lama:

Na partinan protegi di costa: Keto cu olanan rond di 1 pia.

Na partinan zuid protegi: trankil, 1 te 2 pia.

Na partinan zuid no protegi: trankil te modera cu olanan



di 2 te 3 pia.

Na partinan oost te noordwest di costa: Modera te localmente poco bruto cu olanan alrededor di 4 pa 7, localmente e por yega 8 pia.

Aviso/alerta:


Operadornan di boto chikito mester bay cu cautela na partinan oost te noordwest di costa.

Usuarionan di lama y landadonan tambe mester bay cu cautela na partinan expone na zuid, zuidwest y noordwest.

OLIVE TREE
FUNERAL CARE & CREMATORY

*Serca Dios mi ta
na pas
Manera un yiu
serca su mama.*

Cu inmenso
tristes nos
ta anuncia
fayecimento di:



Antonio Teofilo Tromp

Mihor conoci como Toni
*5-03-1944 - † 7-03-2026

Mayornan:

† Thomas & + Catharina Tromp-Tromp

Na number di su:

Casa:

Modesta Cecilia Tromp-Bislip

Yiunan:

Jeanette Tromp y yiunan
Edmundo Tromp y Kimberly Tromp-Croes
Augie Tromp y Luzdaris Tromp-Pirella
Sharon Brete-Tromp y Aldric Brete
Eusebio Tromp y Joyceline Wolff

Nietonan:

Jennysella Tromp, Kimberly Tromp, Nickolas
Tromp, Augie Tromp, Abigail Brete, Jacob
Tromp.

Bisa nieta:

Aliyah Arends

Rumannan:

† Daniel Tromp
† Bibiana Rodriguez Dovalé Tromp y Francisco
y famia
† Candido Thielman-Tromp
† Jacobo Tromp
† Victor Tromp y Helena y famia
† Filomena Tromp

Subrina y Subrinonan, Su Iha Frans Tromp y
sra Ruthline Tromp-Thijssen y famia

**Comer y Compennan, Prima y Primonan,
Swa y Cuñanan y Demas famia:**

Tromp, Bislip, Zievinger, Klepper, Jacobs, St.
Jago, Wolff, Arends, Bislick, De Cuba, Brete,
Geerman, Hieroms, Lewis, Wester, Robles
de Medina, Croes, Kock, Dirks, Larez,
Rodriguez, Do vale, Becker, v/d Linden,
Rafini, Webb, Carrasquero, v/der Biezen,
Vrolijk, Chow, Wernet, Erasmus, Ridderstap,
Ridderstaat, Villa, Donata.

Disculpa nos si den nos tristesa nos por a lubida
un of demas famia.

Ta invita pa acto di entierro di nos defunto
stima Antonio Tromp, cu lo tuma lugar
diaranson 11 maart 2026, for di 2or pa 4or na
Misa Pro Cathedral San Francisco di Playa.
Despues lo bay pa Santana Sabana Basora.

Un Danki Especial na Staff y Personal di Huize
Maristella.

Aurora
Royal Pray
Funeral Home & Crematory

*Hesus a bise: " Ami ta
resurreccion y bida esun cu
kere den mi lo biba asta si
e muri."*

Nos ta anuncia
fayecimento di:



Soljeri Rafaleanne Ridderstapt

Cariñosamente yama: "Sol"
*17-08-1991 - †03-03-2026

Na number di su:

Mama: Cristina Ridderstapt

Tata: Rafael Jose Quijada

Manera tata: Luigi Valentino Rincones

Manera mama: Osayra (Chaya) Romero

Casa: Ivan Dario Almanzo Redondo

Rumannan:

Jenifer y Lloyd Wirht y yiunan
Luenda Ridderstapt y yiunan
Tayennie y Abigaile Vanegas

Wela: †Dolores Ridderstapt

Welo: †Rufo Tromp

Tanta y omonan:

Elvin Ridderstapt
Sabina Ridderstapt y yiunan
Rufina Ridderstapt y yiunan
Tamara y Marlon Istatia y yiunan
†Roxino Ridderstapt
Rufo Agustin y Bellanely Ridderstapt y famia

Bon amigo: Dennis Webb

Miho amigo(a):

Gerrard (Nino) Geerman, Jasmin Podirono, Gerswin
Dania, Anathalia Thode y Giovanni Zuleta Rave y
demas amistad y conocirna y bisña.

Demas famia:

Istatia, Ridderstapt, Hernandez, Pinedo, Gomez,
Reeberg, Werleman, Ras, Tromp, Greaux, Quintero,
Rincones, Quandt, Lesandrina, Odor, Sivenger,
Vrolijk, Meija, Geerman, Monart, Zivenegr,
Kuiperdal, Zuleta Rave, Franken, Romero, Lopez,
Arends, Le Grand, Leolina, Askarzada, Orman,
Olivier, Webb, Soliana, Maduro, Oliveros, Palm,
Jacobs y demas famia na Hulanda, Corsow,
Colombia, Merca

Nos disculpa si pa motibo di nos tristeza por a lubida
algun famia.

Condolencia lo tuma lugar dialuna 9 maart di 7:00 pa
9:00 pm na Aurora Funeral Home

Acto di entierro lo tuma lugar diamars 10 di maart 2:00
pa 4:00 pm na Aurora Funeral Home, despues lo Sali
pa Santana central na Sabana Basora.


Deseo di defunto ta pa bisti na colornan colorido y
alegre.

Nos ta lamenta cu despues di entierro nos no por
ricibi bishita na cas.

Aurora
Royal Pray
Funeral Home & Crematory

*God will open doors for you.
And we know that in all things
God works for
the good of those who love Him.
Romans 8:28*

Cu inmenso dolor na nos
curason, pero conforme cu Dios
su boluntad, nos ta anuncia
fayecimento di nos estimado
espos, ruman, omo y amigo



Herbert Winfield Croes

Mihor conoci como: "Boei"
*16-10-1956 - †06-03-2026

Acto di entierro lo wordo anuncia despues.

Aurora
Royal Pray
Funeral Home & Crematory

*"Señor ta mi wardador, mi'n tin
falta di nada.
Den cunucu di yerba berde e ta
ponemi sosega.
E ta hibami na awa trankil,
pa mi bolbe haña forsa".
Salmo: 23*

Cu dolor na nos curason,
nos ta anuncia fayecimento
di nos ser stima:



**Crispina Crismiana
Carranza-Willems**

Mihor conoci como "Pina"
*25-10-1943 - †05-03-2026

Acto di entierro lo wordo anuncia despues.

Aurora
Royal Pray
Funeral Home & Crematory

*Ki alegria, ora nan a bisa
mi:
"Ban cas di Señor!"
I awor, ata mi aki para na
bo porta Señor.
Salmo 122*

Cu dolor na nos
curason, nos ta participa
fayecimento di nos ser
stima:



Florita Thiel

Cariñosamente yama "Mama Fita"
*22-12-1936 - †08-03-2026

Acto di entierro lo wordo anuncia despues

Democratanan di Merca ta pidi investigacion imparcial di explosion na scol na Iran

(AFP)—Legisladornan Democrata di Merca a urgi dialuna pa Pentagono conduci un investigacion imparcial riba un supuesto atake riba un scol na Iran cu a laga decenas di morto, despues di acusacionnan cu forsanan Americano por tabata responsable.

Iran a acusa Israel y Merca di conduci e atake riba e scol primario den ciudad di Minab na comienso di e guerra. Iran ta bisa cu e explosion a mata mas cu 150 persona, mayoria di nan estudiante.

Presidente Donald Trump a culpa Iran, mientras e Pentagono a bisa cu e ta investigando e incidente.



“Análisis independiente ta indica cu e atake posiblemente a ser conduci pa forsanan di Merca, cual si ta berdad, lo haci esaki un di e casonan mas grave di victimanan civil den decenas di accion militar Americano den Medio Oriente,” varios senador di alto rango a bisa den un declara-

cion conhunto.

“E morto di studiantenan ta un shock y inaceptable den cualkier circunstancia,” nan a agrega, bisando cu e tragedia mester ser “revisa completamente y imparcialmente” pa secretario di Defensa Pete Hegseth.

Corant The New York Times ta bisa cu el a autentica video publica pa agencia di noticia semi-oficial Irani Mehr News cu ta muestra un misil di crucero Tomahawk di Merca dal un estructura describi como un clinica den un base di e Guardia Revolucionario cerca di e scol.

Segun The Times, den e guerra aki e unico ehercito cu ta usa misil Tomahawk ta Merca.

The Times a reporta anteriormente cu declaracionnan di e ehercito Americano indicando cu forsanan tabata atacando blanconan naval cerca di e Estrecho di Hormuz — unda tin un base di e Guardia Revolucionario — “ta sugeri

cu probablemente nan a conduci e atake.”

E legisladornan a bisa cu e incidente ta aun mas preocupante considerando loke nan a yama e “manera demasiado descuida” di Hegseth tocante uso di forsa. El a bisa siman pasa cu atakenan di Merca na Iran no lo ser limita pa “reglanan estúpido di combate.”

Entre esnan cu a firma e declaracion tabata Jeanne Shaheen, e Democrata di rango mas alto den e Comité di Relacion Exterior di Senado.

AFP no a logra bishita e sitio di e explosion na scol pa verifica e cantidad di morto of detaye di loke a sucede.

Francia y su aliadonan ta preparando mision pa habri Estrecho di Hormuz “gradualmente”

(AFP)—Francia y su aliadonan ta preparando un mision “defensivo” pa habri e ruta maritimo strategico di Estrecho di Hormuz atrobe, presidente Emmanuel Macron a bisa dialuna mientras e guerra den Medio Oriente ta drenta su segunda siman.

E lider Frances a yega cu helicopter riba e portaavion Charles de Gaulle, cual a ser manda pa Lama Mediterraneo despues cu atakenan di Merca y Israel riba Iran riba 28 di februari a causa un guerra cu a crea caos regional y cu ta menasa di expande pa otro parti di mundo.

Macron ã bisa durante un bishita na Cyprus mas tempran den dia cu e mision pa Hormuz lo tin como meta escolta barconan di container y tanker di petroleo pa gradualmente habri e ruta maritimo “despues di un fin di e fase mas intenso di e conflicto.”

“Esaki ta esencial pa comercio internacional, pero tambe pa e fluho di gas y petroleo, cual mester por sali for di e region di Golfo atrobe,” Macron a bisa durante su bishita na e isla pa discuti seguridad regional.

Papiando hunto cu presidente di Cyprus Nikos Christo-



doulides y prome minister di Grecia Kyriakos Mitsotakis, Macron a bisa cu un “mision puramente defensivo, puramente di apoyo” lo ser organisa pa estadonan Europeo y no-Europeo.

Union Europeo a bisa dialuna cu e ta cla pa “fortalece” su operacionnan pa protege trafico maritimo den Medio Oriente.

EU tabata discutiendo caba pa reforsa su mision naval den Lama Cora despues cu e atakenan di Merca y Israel riba Iran a provoca un guerra regional mas amplio.

Trafico maritimo den Estrecho di Hormuz, un ruta maritimo clave di Golfo unda

un quinta parti di petroleo mundial ta pasa, casi a para completamente desde cu e guerra a cuminsa.

Macron a bishita Cyprus despues cu e pais miembro di EU a bira blanco di dronenan fabrica na Iran siman pasa.

E lider Frances a bisa cu un atake riba Cyprus ta un atake riba henter Europa.

“Ora Cyprus ser ataca, ta Europa mes ser ataca,” el a bisa.

E atake cu drone na Cyprus a causa Francia pa manda e portaavion Charles de Gaulle pa Lama Mediterraneo, como tambe un fragata y unidadnan di defensa aereo pa e isla.

Paris a insisti cu su posicion den e region ta “estrictamente defensivo.”

Bombardeo no lo trece cambio

E prome atakenan di Merca y Israel riba Iran a mata e lider supremo Ali Khamenei, y e republica Islamico dialuna a nombra su yiu Mojtaba Khamenei como su sucesor — un decision cu presidente di Merca Donald Trump a bisa cu e “no tabata contento” cune.

Abordo di e Charles de Gaulle, Macron a bisa cu duracion di e conflicto ta depende di kico ta e obhetivo di Merca y Israel, advirtiendo cu cambianan “profundo

den liderazgo di Iran no por sucede “solamente door di bombardeonan di Merca y Israel.”

“Nos ta poniendo nos mes den un posicion pa dura,” el a bisa, agregando cu e guerra, “den e fase intenso aki,” por dura “varios dia, talbes varios siman.”

Macron a bisa cu e portaavion Charles de Gaulle eventualmente por ser manda pa e Estrecho di Hormuz como parti di e mision anuncia.

Un fragata Frances ya ta participando den e Operacion Aspides di EU, cual a ser lansa den Lama Cora na 2024 pa preveni atakenan riba barconan comercial pa rebelde-nan Houthi cual ta respalda pa Iran.

Macron a bisa anteriormente cu Francia lo contribui “a largo plazo” cu dos fragata na e Operacion Aspides. “Loke nos kier haci ta sigura libertad di nabegacion y seguridad maritimo,” el a bisa.

Separadamente, e presidente Frances a papia dialuna mainta cu prome minister Israeli Benjamin Netanyahu tocante e situacion den Medio Oriente y Libanon, segun Palacio Elysee.

Gobierno di Merca a acusa China di facilita trafico di fentanilo

(Infobae) - Gobierno di Merca a acusa China di aluna di permiti su industria kimico mantene relacion cu cartelnan di narcotrafico, facilitando asina e fluho di precursor kimico pa fabrica fentanilo, un opioide cu a causa shen miles di morto den Norte America y cual autoridadnan Norte Americano a defini como un “arma di destruccion masivo”.

“Nos sa di unda e precursor kimiconan ta bin. Nan ta ser produci den miyones di tonelada na China. Nos sa cu nan ta move via e cadena global di suministro”, Sara Carter a declara durante un reunion di Nacionnan Uni na Vienna.

“Nos sa cu control debil di exportacion y aplicacion di ley na China ta permiti industria kimico establece relacion cu cartelnan”, Carter a agrega durante e reunion di UN Commission on Narcotic Drugs, cual a reuni den e capital Austriaco.

Na mesun momento, e representante Norte Americano a destaca cu control “efectivo” cu China tin riba metal raro — esencial pa hopi tecnologia moderno — tambe ta causa impacto serio riba



industria legitimo. Apenas aña pasa, casi 80.000 persona a muri na Merca como consecuencia di sobredosis y venenamento relaciona cu droga, incluyendo cocaina y metanfetamina mescla cu fentanilo.

E substancia aki ta 50 biaha mas potente cu heroína y autoridadnan Norte Americano ta describi esaki como un “arma di destruccion masivo”.

P’esey Carter a defende un reaccion internacional mas fuerte contra narcotrafico y a adverti cu traficantenan di droga ta liderando un tipo di “guera kimico” por medio di distribucion di fentanilo y

otro substancianan sintetico.

El a agrega cu varios pais den e hemisferio occidental ta fortalece cooperacion cu Merca pa combati narcotrafico den un manera mas intenso.

Como ehempel di e reaccion mas firme aki, Carter a menciona captura di “dictador Maduro”, refiriendo na ex-presidente di Venezuela, Nicolas Maduro, kende actualmente ta deteni den un prison na New York.

E tambe a menciona eliminacion di “El Mencho” di parti Mexico, lider di e cartel Jalisco New Generation Cartel, y a expresa condolencia na gobierno Mexicano y na

famianan di esnan cu a muri durante violencia cu a surgi despues di su morto.

Finalmente, Carter a defende e accion coordina pa ataca no solamente narcotrafico, sino tambe mecanismo di financiamiento di e organizacionnan criminal. El a enfatisa cu comunidad internacional no por permiti organizacionnan cu ta busca pa destrui sociedad y debilita estado continua prospera.

Fentanilo: di medicina pa un di e droganan mas peligroso

Fentanilo ta un opioide sintetico originalmente desaroya pa uso medico den pashent

cu enfermedad cronico of dolor extremo. Su efecto ta similar na morfina, pero cu un potencia casi 100 biaha mas fuerte.

A pesar di ser crea originalmente como medicamento, fentanilo tambe ta ser produci ilegalmente den laboratorio clandestino, frecuentemente sin control di produccion, y hopi biaha ta mescla cu otro droga ilegal.

Su presentacion — generalmente den forma di pildo of capsula, hopi biaha cu color fuerte — ta haci droga aun mas peligroso, specialmente pa adolescente, ya cu dosis adulto por resulta mortal pa nan.

Ademas, fentanilo ta facil pa haya actualmente: via internet, criptomoneda y rednan ilegal, lo cual ta amplia su distribucion y ta pone hobennan particularmente vulnerabel.

E efecto di fentanilo por resulta fatal den poco minuut. E substancia ta afecta e cerebro y por stroba funcion vital manera respiracion. Ademas, su efecto ta dura menos cu hopi otro droga — usualmente alrededor di dos ora — lo cual ta causa usuarioman usa e substancia repetidamente, aumentando riesgo di sobredosis.

Putin a felicita yiu di Khamenei pa hereda puesto di lider supremo di Iran y a garantisa su apoyo “inmovibel”

(Infobae) - Presidente di Rusia, Vladimir Putin, a felicita Mojtaba Khamenei dialuna pa su eleccion como lider supremo nobo di Iran y a reafirma cu apoyo y solidaridad di Moscu cu Teheran ta keda “inmovibel”, segun un comunicado publica riba website di Kremlin.

“Rusia tabata y lo sigui ta un socio confiabel di Republica Islamico di Iran”, Putin a skirbi den e mensahe, cual a ser publica pa e agencia estatal di noticia TASS.

Eleccion di Khamenei junior a ser confirma pa e Asamblea di Expertonan. E clerigo di 56 aña, conoci pa su relacion estrecho cu Islamic Revolutionary Guard Corps y considera aun mas firme cu su tata, ta asumi e cargo memey di continuo bombardeonan di Merca y Israel riba terito-

rio Irani.

Su tata, Ali Khamenei, kende a goberna Iran pa 37 aña, a muri e prome dia di e atakenan hunto cu varios miembro di su famia, incluyendo casa di e lider supremo nobo. Den su felicitacion, Putin a enfatisa cu mandato di yiu di Khamenei lo rekeri “gran curashi y dedicacion” na un momento cu Iran ta enfrenta loke el a yama “agresion arma”.

“Mi tin confiansa cu e lo continua cu e trabao di su tata cu honor y cu e lo unifica e pueblo Irani durante e pruebanan dificil aki”, e presidente Ruso a declara.

Kremlin tambe a enfatisa solidaridad di Moscu cu su “amigonan Itani” y a desea e lider nobo exito “den e tarcanan dificil cu ta su dilanti”. E gesto ta forma parti di vari-

os contacto reciente entre Moscu y Teheran desde e comienso di e conflicto.

Diabierna pasa, Putin a papia via telefon cu presidente di Iran, Masoud Pezeshkian, durante cual el a ripiti condolencia di Rusia pa morto di lider supremo y a pidi un “paro inmediato di hostilidadnan” y un retorno rapido na diplomacia.

Pezeshkian, pa su parti, a gradici solidaridad Ruso y a duna Putin informacion detaya riba e fase actual di e conflicto.

Ya 1 di maart, Putin a manda un telegram di condolencia den cual el a describi e morto di Ali Khamenei como un “violacion cinico” di tur norma internacional.

Apoyo di Moscu pa Teheran ta contrasta cu e posicion di



Washington. Presidente di Merca, Donald Trump, a yama e lider supremo nobo “inaceptabel” y a describi e como un “lider debil”, mientras Israel ya a menciona publicamente su nombre como posible obhetivo militar.

Na nivel regional, Putin a indica cu e ta mantene contacto permanente cu lidernan di e

Gulf Cooperation Council, memey di un escalacion cu ya a inclui atakenan Irani contra infraestructura energetico na Saudi Arabia, Emirato Arabe Uni, Kuwait, Qatar y Bahrain.

E tension regional a pusha prijs di petroleo Brent cerca di 120 dollar pa bari dialuna.

Legisladornan di EU ta respalda “centronan di retorno” pa migrantenan

(AFP)—Legisladornan di Union Europeo (EU) a duna aprobacion preliminar dialuna pa un fortalecimiento di e politica di inmigracion di Europa, habriendo caminda pa loke ta yama “centronan di retorno” pa solicitantenan di asilo cu a ser rechasa, despues cu diputadonan di centro-derecha y ultra-derecha a logra pasa e propuesta.

Estadonan miembro di EU ya a aproba medidanan cu ta responde na e presion den e bloc di 27 pais pa limita inmigracion irregular — pero esaki a haya critica fuerte di parti di izquierda y gruponan di derecho humano.

Un comite di Parlamento Europeo a tene un votacion inicial riba e legislacion dialuna, prome cu un votacion



general pa aproba e texto, posiblemente pa diahuebs caba.

Legisladornan di centro-derecha y ultra-derecha a logra un acuerdo na ultimo momento, evitando un in-

tento di centrismen pa aproba un texto di compromiso.

E reforma lo permiti particularmente habri centronan pafor di frontera di EU unda migrantenan di ken nan so-

licitud di asilo a ser rechasa lo ser manda — loke ta conoci como “centronan di retorno”.

E propuesta tambe ta contempla sancionnan mas fuerte pa migrantenan cu ta nenga di sali, incluyendo detencion y prohibicion pa dreña.

Parlamentario Frances di centro-derecha Francois-Xavier Bellamy a celebra e votacion como “un paso decisivo pa dilanti” cu lo permiti Europa “recupera control” di su politica di migracion y aborda yegadanan irregular.

Pero Murielle Laurent di e grupo Socialista y Democratanan di centro-izquierda a bisa cu e texto no ta contempla obligacionnan legal pa tercer paisnan cu lo por hospeda e centronan di retorno y tampoco no ta especifica ken lo ta legalmente responsable pa e personanan manda aya.

“Door di delega nos politica di asilo y retorno na tercer paisnan, nos ta dreña un era nobo di comercio di hende unda migrantenan ta ser expulsa contra nan boluntad na cambio di placa,” el a bisa.

Gobiernonan Europeo a busca pa adopta un posicion mas duro mientras opinion publico riba migracion ta birando mas negativo, algo cu a contribui na victorianan electoral di partidonan ultra-derechista den henter e continente.

Mirando cu yegada di migrantenan a baha na 2025, atencion na Bruselas awor ta pa concentra riba mehora e sistema di repatriacion, cual actualmente ta musta cu apenas rond di 20 porciento

di esnan ordena pa sali realmente ta bolbe pa nan pais di origen.

E medidanan, proponi inicialmente pa e Comision Europeo aña pasa, a haya critica fuerte di ONGnan incluyendo Amnistia Internacional, cual a bisa cu nan ta implica un “riesgo serio di violacion sistematico di derecho humano”.

Maria Nyman di e organizacion humanitario Catolico Caritas a bisa cu e proyecto di ley por “haci detencion bira normal” en bes di un medida di ultimo recurso y lo “delega responsabilidadnan di EU”, creando “centronan di deportacion de facto pafor di supervision efectivo di derecho humano”.

“Nan ta permiti centronan di deportacion den paisnan unda migrantenan nunca no a bay, y esaki lo causa mas vigilancia y discriminacion,” Silvia Carta di PICUM a agrega, un organizacion cu ta protege migrantenan indocumenta.

E reglanan ta introduci practicanan cu “ta recorda e violencia” asocia cu redadanan di Immigration and Customs Enforcement (ICE) na Merca, el a bisa.

Algun pais den e bloc, incluyendo Francia y Spaña, a cuestiona e efectividad di centronan di retorno.

Reino Uni a bandona un plan pa deporta migrantenan indocumenta pa Ruanda, mientras facilidadnan administra pa Italia na Albania pa procesa migrantenan a enfrente desafio legal y poco uso.

Otro paisnan manera Alemania, Austria y paisnan Norrico ta spera cu e centronan lo actua como disuasion y desanima migrantenan di purba yega Europa.

Crusamento irregular di frontera y solicitudnan di asilo na EU a baha cu 26 porciento y casi 20 porciento respectivamente na 2025, segun dantonan oficial.

Despues di aprobacion completo di Parlamento Europeo, legisladornan di EU y representante di estadonan miembro lo cuminsa negociacionnan riba un texto final.

JOIA

BY IBEROSTAR

BUCATINI

MARKET & CUCINA

MARCH 18, 2026 | 7AM - 12PM

HIMNO
& BANDERA

\$50 Local Inspired Breakfast Buffet

15% LOCAL DISCOUNT

RESERVATIONS TROUGH OPENTABLE.COM